

## HOMANO Paoro Iokanatsopatakiti Homa Auakanimoni

<sup>1</sup> Nota Paoro iokanatsopata hītemoni. Xesosi Kristo nitirikarano nota. Teoso mereēno nota iua iokanatakiti kākitimoni nininiua īkapani. Iua akiritano nota, Teoso iokanapirena erekari kākitimoni nisāpiretini īkapani. Ikara parīkatxinoka inireka nikamini. <sup>2</sup> Kitxakapirīka Teoso sākire sāpiretakani sāpiretaua Teoso sikaenetakiti, iua iokanapirena erekari. Teoso sākire iōkatsopatakoriā ikara atatsopataāka.

<sup>3</sup> Ia Teoso iokanapirena erekari sāpiretaua aāuīte Xesosi Kristo Teoso ākiri ininiua. Kākiti itxapekaua. Iuasaaki Tavii apika mekaniri itxaua. <sup>4</sup> Iuaritika Teoso ākiri itxaua. Erekari Matamatakoti oerekari kākiti Teoso ākiri ininiua Xesosi, kotxi ōkitikari Xesosi ipīkaripeka. Iuaīkana aua itxa. Ikara posotiiretxi apiari oerekari kākiti Xesosi Teoso ākiri ininiua. <sup>5</sup> Xesosi Kristo sikaua ikinipoko erekari. Ininiā iokanataua ikini itixitimoni, kākiti isākire asāpiretini īkapani, isākire auikinina īkapani, isākire iaōka ikaminina īkapani. Ikara atoko aparīkauata Kristo īkapani.

<sup>6</sup> Hītepekana, Teoso akiritai hīte apaka Xesosi Kristo nakitiakori hininiua īkapani. <sup>7</sup> Ininiā nota iokanatsopata hītemoni Teoso tirketakinimoni, Homa sitatxiti auakanimoni. Teoso akiritai hīte iua nakitiakori hininiua īkapani. Aīri Teoso, Apiananiri Xesosi Kristo apaka sikari ikinipoko erekari hītemoni. Ikamaerekaxiniretai hīte.

### *Paoro Nirekari Isini Homa Auakanimoni*

<sup>8</sup> Merepanika nitxari niTeosone: “Erekapitikai, kotxi Homa auakani iteene auikari pisākire. Ikini tōpati

auakani kenakopiretari ninoa auikiniri pisākire,” nitxari Teoso Xesosi Kristo uākaā. <sup>9</sup> Nisākirauatakasaaki Teosokata, nimisākiretari Teoso hīte īkapani. Ātipirika nimisākiretari Teoso hīte īkapani. Teoso imarotari ikara nisākire atāo inini. Nota parīkauata Teoso īkapani. Iuanoka ninireka nikamini. Nisāpiretari iua iokanapirena erekari imi pirena kākitimoni. <sup>10</sup> Nimisākiretakasaakiri Teoso, nitxari: “Pauritiniāno, ninirekari paītiki Homa auakanimoni nisini. Mitxi !apakata ninoamoni nisini. Pinirekiniāri iuaā nisini, pimoianatano ninoamoni napokini īkapani,” nitxari. <sup>11</sup> Iteene ninirekari naōkitinii hīte, kotxi ninirekari Teoso kamataratiniri hākixinire nisākireē. <sup>12</sup> Ininiā nota kamataraxiniretaiko hīte, kotxi himarotari nota iteene auikiniri Xesosi sākire. Apaka hīte kamataraxiniretano nota, kotxi hīte apaka iteene aukari Xesosi sākire.

<sup>13</sup> Nitariakori, ninirekari himarotiniri itokatapiima namamatama hītemoni nisini īkapani, txamari iuasaaki ! apakata nisini. Itomaneri kākiti Xoteo minakanuia ātiātaā auakani aukari Xesosi sākire. Ininiā iua atokotxikana ninirekari kaiāopokori kākiti hīte sauaki auakani apaka auikiniri Xesosi sākire. <sup>14</sup> Nisāpiretari Teoso sākire ikini-napemoni. Nisāpiretari sitatxi auakanimoni. Nisāpiretari ītopa auakanimoni apaka. Nisāpiretari iōkatsopari imarotakanimoni. Nisāpiretari iōkatsopari mimarotakanimoni apaka. Ikara niparīka. <sup>15</sup> Ininiā iposope nitxa nisāpiretiniri Teoso iokanapirena erekari hīte Homa sitatxiti auakanimoni apaka. Ikinika nitaparaā nisāpiretai.

<sup>16</sup> Na nipētauata Kristo iokanapirena erekari nisāpiretinii, kotxi iua iokanapirena oerekaua Teoso posotiire iua sākire auīākani maerekani imaktxakini īkapani. Kaposotiireri iua, ininiā imaktxakari ikinimane maerekani, iua sākire auīākani maerekani. Ikara ikaminana Xoteoakori merepanika. Eereka ikaminana Xoteo minaka-

niuma apaka. <sup>17</sup> Teoso iokanapirena erekari sãpiretaua Teoso txĩkitakiniri kãkiti atão inakarinoka ikamini. Teoso sãkire auikikoãnokara, kãkiti txĩkitakaãka atão inakarinoka ikamini. Teoso sãkire iõkatsopatakori txari:

Kãkiti atão inakarinoka kamakani auini erekari, kotxi ninoa auikari Teoso sãkire.

*Kãkiti Kamakiti Maerekati*

<sup>18</sup> Teoso iaxiti auakari oerekaua iua omanãkarauatini kãkiti maerekani xika, ininiãkara iua misiritariko kãkiti, kotxi kãkiti !inirekari Teoso paniãtakiti ikamini. Ikamarina maerekatina. Maerekati ikamakasaakina, ikipatarina atão inakari. <sup>19</sup> Kãkiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kãkitimoni iua imarotinina ãkapani. <sup>20</sup> Teoso kamari itixi, ininiã kãkiti atamatakasaakiri Teoso kamakiti, imarotari kiãtokopa itxa Teoso. Matamatakoti itxaua Teoso, iuaritika kãkiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kãkiti imarotari ikara atoko inakari itxaua Teoso, iua kamakiti atamatakasaakina. Ininiãkara kãkiti imarotapitikari Teoso auini. Ininiãkara na atão kãkiti sãkire: “Na nimarotari Teoso auini inini.”

<sup>21</sup> Kãkiti imarotari Teoso auini, iuaritika !isãpiretarina Teoso: “Atão Teoso pitxaua,” !itxarina. !Isãpiretarina Teoso: “Erekapitikari pikamakiti ate ãkapani,” !itxarina. !Kiĩkitena. !Imarotaikarina atão inakari, kotxi ãkixinireẽna maerekatina aua. <sup>22</sup> Ninoa sãkire: “Kimaroreua ate,” txamari !kiĩkitena. <sup>23</sup> Teoso mapinakatimoni !itxana: “Pitenokara Teoso txaua,” !itxarina. Kãkiti ipinapitika, iuaritika kamakori kãkiti atoko inakari imisãkiretana: “Pite ateosone,” itxana. Kamakori kotipiriki atoko inakari, kamakori pirãtxi atoko inakari, kamakori imini atoko inakari pakini ninoa misãkireta: “Hĩte ateosone,” itxana.

<sup>24</sup> Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina iĭtona nireēkiti. Ninoaka na paxitauana iĭtona, kotxi āti sirīka ātikata. <sup>25</sup> !Inirekarina auikininirina atāo inakari Teoso sākire. Inirekarina auikininirina atāo minakati. Teoso kamakitimoni itxana: “Pite ateosone. Aparīkauata pite ĩkapani,” itxana. Ikinipoko kamakarimoni !itxana: “Pite aTeosone. Aparīkauata pite ĩkapani,” !itxana. Atāo inakari kamakani ātipirika txari ikinipoko kamakari: “Peerekai pite.” Ameē.

<sup>26</sup> Ikara kākiti maerekani xika, Teoso takanapana ninoa. Auiritana maerekati kākiti kapēta txikitaākari, iĭtona nireēkiti ikaminina. Ininiā sito na nirekaikari kikikata osirīkini. Sito nirekari āto sitokata osirīkini. !Apakata. Ikara maerekati itxaua. <sup>27</sup> Iua atokokana kiki !inirekaikari sitokata isirīkini. Kiki nirekari āti kikikata isirīkini. !Apakata. Ikara maerekati itxaua. Ininiākara iĭtona misiritaākako imaerekanina xika.

<sup>28</sup> Ninoa imaroreē !inirekarina imarotininirina Teoso, ininiā Teoso takanapana. Auiritana ixinikinirina atāo minakati. Maerekatinoka ixinikakitina, ininiā ikamarina atāo minakati. <sup>29</sup> Ākixinireēna auā ikini sereti maerekati. Iĭtona nireēkitinoka ikamana. Ātipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Ākixinireēna ixikotarina āti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aāpirena ikamana. <sup>30</sup> Imisākirepiretarina āti. Omanatarina Teoso. !Ipaxitarina apanakini imisākiretakasaakina. Iuikauana. Ātipirika: “Paimatireua ate,” itxanātana. Ixinikapikarina: “Natokopa itxa apikomoni maerekati akamini.” !Ikīpitarina iri paniātakiti, inoro paniātakiti pakini. <sup>31</sup> !Kīikitena. !Ikamarina ikamaenetakitina. !Itiretarina inirimane. !Inirekarina neenamatchi ixipokinina. !Ia-

monĩkana apanakini. <sup>32</sup> Teoso sãkire txari: “Kãkiti ikara atoko inakani ipinapitikako. Ninoa ipinini atão.” Ikara Teoso sãkire imarotapiikamana, iuaritika ikamapanikarina ikara maerekati. Apaka apokaarekatarina apanakini, maerekati ikamakasaaki.

## 2

### *Teoso Misiritari Maerekati Kamakani*

<sup>1</sup> Atxiĩti hĩte txari: “!Erekana ninoa, kotxi ninoa kamari maerekati,” hĩtxa. !Apakata ikara atoko hinini, kotxi hĩte apaka kamari maerekati ninoa kamakiti atokotxikana. Ininiã !apakata kãkiti akiritiniri ãti kãkiti maerekati kamakari ininiua. <sup>2</sup> Apakatapitika Teoso akiritiniri kãkiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. <sup>3</sup> “Ninoa maerekati kamakani misiritaãkako,” hinakasaaki, hixinikari hĩte apaka kamari maerekati ninoa kamakiti atokotxikana. Ininiã hĩte apaka !hinapakakapaniri Teoso misiritinii hĩte. <sup>4</sup> Atxiĩti na hĩte maãkatari Teoso, kotxi hĩte txari: “Teoso katiraõkiri itxaua,” hĩtxa. Atxiĩti na himaãkatari Teoso, kotxi iuasaaki !imisiritapanikai hĩte. Atxiĩti na himaãkatari Teoso, kotxi Teoso ãtipirika mĩteenekai hĩte. Teoso nirekari hĩtakanapiniri maerekati hĩkamakiti, erekarinoka hĩkamini ikapani. Ininiã iua tiretai hĩte. Ikara hĩte imarotamako.

<sup>5</sup> Txamari hĩte paikoxinirei. Na hinirekari himaerekani hĩtakanapini. Ininiã himisiritiko apiaãpotako. Kãkiti misiritiko õti apokasaaki, Teoso misiritapitikaiko hĩte. Iuasaaki kãkiti imarotariko Teoso omanãkare imaerekani xika, kotxi Teoso atão imarotari kãkiti kamakiti. <sup>6</sup> Ikamakiti erekari ininiãua, Teoso sikari erekari iuamoni. Txamari ikamakiti maerekati ininiãua, Teoso misiritariko iua. <sup>7</sup> Aua kãkiti ãtipirika erekari kamakani. !Isãpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina

ãtipirika. Kãkiti ikara atoko inakani Teoso txĩkitakana ãtipirika auinina ĩkapani. <sup>8</sup> Apanakinipekana kamari inireẽkitinoka. !Inirekarina atão imarotinina. Maerekatinoka inirekana ikaminina. Teoso omanatana kãkiti ikara atoko inakani. Teoso misiritanako ninoa. <sup>9</sup> Ikinipoko kãkiti maerekati kamakani maxikaãkako. Atatsiirau-atako. Merepanika Xoteo misiritaãkako, eereka Xoteo minakanuia apaka misiritaãkako. <sup>10</sup> Teoso txanako kãkiti erekari kamakani: “Erekapitikai hĩte.” Ikara atoko itx-  
 anako merepanika Xoteoakori, eereka Xoteo minakanuia apaka. Teoso paxitanako ninoa. Ikamaerekaxiniretanako. <sup>11</sup> Teoso misiritana ikini kãkiti maerekati kamakani. ! Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

<sup>12</sup> Xoteo minakanuia ! auari Moisesi sãkire Teoso paniãtakiti iõkatsopatakori. Ninoa kamari maerekati, ininiã Teoso paniãtakiti imimarotakanisaaki ipinana. Xoteoakori aua Teoso paniãtakiti iõkatsopatakori. Ninoa apaka kamari maerekati. Ininiã Teoso misiritana ninoa, isãkire iõkatsopatakori iaõka imakamakani xika. <sup>13</sup> Teoso kamaerekatari isãkire iaõka kamakani. Pike-nakotakasaakiri Teoso sãkire, txamari !pikamari isãkire iaõka, iuasaaki Teoso !ikamaerekatai pite. <sup>14</sup> Xoteo minakanuia !auari Teoso sãkire iõkatsopatakori. Iuaritika atxiĩti ikamarina Teoso paniãtakiti iõkatsopatakori iaõka, kotxi ikamarina ãkixinirena sãkire iaõka. !Auari Teoso sãkire iõkatsopatakori ninoamoni, iuaritika Teoso paniãtakiti auape ãkixinireẽna. <sup>15</sup> Teoso paniãtakiti iaõka ikamakasaakina, oerekarina imarotininina atão inakari ãkixinireẽna. ãkixinirena sãkire sãpiretana atão. ãtikata itx-  
 ana: “Pite kamari maerekati. !Apakata.” ãtikata erekari ikamakasaakina, “Pite kamari erekari. Erekapitikari.” Itxa ãkixinirena sãkire. <sup>16</sup> Kãkiti kamakiti imarotiko

ōti apokako. Iuasaaki Teoso paniātariko Xesosi Kristo sãpiretiniri kãkiti kamakiti. Kãkiti kamakiti apanakini mimarotakiniti apaka isãpireta. Iuasaaki isãpiretari kãkiti misiritiko imaerekani xika. Teoso iokanapirena erekari nisãpiretakiti oerekapekari ikara atoko inakari.

*Xoteoakori Auari Teoso Paniãtakiti Iõkatsopatakori*

<sup>17</sup> Hĩtepekana, hĩte txari: “Ate Xoteo atxaua. Teoso apakapapitikaua ate, kotxi isikari ipaniãtakiti iõkatsopatakori atemoni. Atenoka Teoso anaakori atxaua,” hĩtxa. Ininiã hĩteka iuikaua. <sup>18</sup> Hĩte imarotari Teoso nireẽkiti hĩkamini. Himarotari Teoso paniãtakiti iõkatsopatakori, ininiã himarotari erekari apiari hĩkamini. <sup>19</sup> Hĩtxari: “Atera oerekari Teoso kimapore, ikimapore mimarotakanimoni. Mõsiãreni atoko itxana ninoa,” hĩtxa. “Ate imarotari Teoso sãkire, ininiã ate imarotari apanakini aõerekini. Ininiã ate tirikapi atoko atxaua. Apanakini ipiã sikani atoko itxana ninoa.” Ikara atoko hĩtxa hĩte. <sup>20</sup> Hĩtxari: “Koerekarerini atxaua. Kãkiti miĩkiteni oereẽkani atxaua. Ate oerekari kãkiti poião imarotakani. Ate imarotari ikinipoko. Aimarotari atão, kotxi Teoso sãkire iõkatsopatakori aua atemoni.” Ikara atoko hĩtxa hĩte. <sup>21</sup> Hĩte Xoteo inakanuia oerekari apanakini. Kinirepa kona hĩteka oerekaua apaka? Hĩte õtãkikari apanakini: “!Piĩtiriuatape”. Kinirepa hĩte na takanapari hiĩtiriuatini? <sup>22</sup> Hĩte õtãkikari apanakini: “!Pisiriĩkape pĩtanoro minakotokatika.” Kinirepa hĩte apaka sirĩka hĩtanoro minakotokatika? Hĩte omanatari teoso kamakori, ininiã kinirepa hiĩtirĩkari ninoa teosone aikoti tii? <sup>23</sup> Hĩte iuikaua, kotxi Teoso sãkire iõkatsopatakori aua hĩtemoni, txamari apanakini na paxitari Teoso hĩte xika, kotxi kona hĩte kamari Teoso sãkire iaõka. <sup>24</sup> Teoso sãkire iõkatsopatakori txari:

Hĩte Xoteo xika, Xoteo minakanuia misãkirepiretari Teoso,

itxa Teoso sãkire iökatsopatakori.

<sup>25</sup> Teoso takaõtxikare aua hiïtoã. Teoso paniãtakiti hĩkaminiã, erekapitikari Teoso takaõtxikare hiïtoã auini. Teoso paniãtakiti iökatsopatakori himakamakaniã, Teoso takaõtxikare mauakiniti atoko hĩtxaua. <sup>26</sup> Xoteo minakatiua, Teoso takaõtxikare iïtoã mauakini, Teoso sãkire iaõka ikaminiã, Teoso txariko: “Iua Xoteo atokotxikana itxa. Nitakaõtxikare iïtoã auakiti atokotxikana itxaua.” <sup>27</sup> Hĩte Xoteoakorimoni aua Teoso paniãtakiti iökatsopatakori, iuaritika ! hĩkĩpitari Teoso sãkire. Teoso takaõtxikare auapitikama hiïtoã, iuaritika ! hĩkĩpitari Teoso sãkire. Xoteo minakaniua ! auari Teoso takaõtxikare iïtoãna, iuaritika ninoa kamari Teoso paniãtakiti iökatsopatakori. Ikara atoko ininiã, ninoa oerekai himaerekani.

<sup>28</sup> Kiripa atão Xoteo? Kiripa Teoso nakiti txataua? Kirimonipa aua Teoso takaõtxikare atão inakari? Teoso takaõtxikare iïtoã auakini, na ikinikani atão Xoteo itxauana. <sup>29</sup> Teoso paniãtakiti iökatsopatakori ! oerekaua Teoso nakiti aniniua. Xoteo atão inakariua, Teoso nakiti itxaua ãkixinireẽ. Teoso takaõtxikare aua iua ãkixinireẽ. Erekari Matamatakoti takari Teoso takaõtxikare iua ãkixinireẽ. Inirekari kãkiti iuikiniri. Inirekari Teoso iuikiniri.

### 3

#### *Teoso Kamari Ikamaenetakiti*

<sup>1</sup> Atxiïti hĩte txano nota: “Teoso apakapari Xoteo. Teoso apakapari Xoteo minakaniua apaka, ininiã ! api-aerekata Xoteo aniniua. !Apiaerekata Teoso takaõtxikare aïtoã auini.” Atxiïti ikara atoko hĩtxa. Txamari na atão. <sup>2</sup> Apiaerekatapitika Xoteo aniniua, kotxi Teoso merepitipanika sãpiretari iuaka sãkire Xoteomoni, ninoa iökatsopatiniri ĩkapani, inĩkatinirina ĩkapani. <sup>3</sup> Iuaritika apanakini Xoteo ! auikari Teoso sãkire. Ikara xika atxiïti



Teoso !ikamari ikamaenetakiti? <sup>4</sup> Ikamapitikari. Atxiiti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iuasaaki imarotaākako Teoso kamakiti atāo inini.

<sup>5</sup> Atxiiti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotiniiri Teosonoka kaminiri atāo inakari. Ininiā !apakata Teoso misiritiniua ate, maerekati akamini xika.” Atxiiti aua kākiti ikara atoko ina sākiretakani. <sup>6</sup> Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

<sup>7</sup> Atxiiti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: ‘Teosonoka ereka,’ itxana. Ininiā !apakata Teoso misiritiniua amaerekani xika.” Atxiiti aua kākiti ikara atoko ina sākiretakani. <sup>8</sup> Ikara atāo ininiā, maerekati makama erekari apokini ikapani. Txamari ikara sākiretxiti na atāo. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

### *!Auari Kākiti Erekar*

<sup>9</sup> Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. <sup>10</sup> Teoso sākire iōkatsopatakori txari:

!Auari atāo inakari kamakari. Ātika !auari.

- 11 Teoso nireëkiti imarotakari !auari. Teoso nirekakari !auari.
- 12 Ikinimane kaporïkikari Teoso. Ikinimane kerokari ikamakiti. Erekarikamakari !auari. Ātika !auari.
- 13 Kākiti sākire maerekati, itotxi arakakari saka atoko itxa. Itotarina imisirienetinirina apanakini. Kākiti sākire imini tsiã atoko itxa.
- 14 Ātipirika imisākirepiretarina āti, kotxi inïkatarina omanākaretxi ākixinireēna.
- 15 Maxikatiïka inirekarina okinirina āti.
- 16 Isininimonina imaxikana apanakini. Maerekaxinireni-noka itxïkitakana apanakini.
- 17 !Imarotarina neenamatchi itakanapinina.
- 18 !Ipaxitarina Teoso. !Ipïkarina iua. Itxa Teoso sākire iōkatsopatakori.

19 Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireëkiti aimarotini ikapani. Ininiã !apakata ate, Xoteo minakanuia pakini: “!Nimarotari Teoso nireëkiti,” anini, kotxi isāpiretapekari inireëkiti akamini tïkane. Ininiã atāopitikara Teoso misiritinina ikinimane maerekati kamakani. <sup>20</sup> Ikinika Teoso paniātakiti iōkatsopatakori !aposota akamini, ininiã Teoso kona kamaerekataua. Teoso paniātakiti iōkatsopatakori oerekaua maerekati kamakani aniniuua.

### *Natokopa Itxa Teoso Kamaerekatiniri Kākiti?*

<sup>21</sup> Uatxa Teoso oerekepekaua itxïkitakiniri kākiti atāo inakari kamakani ininiuua. Teoso paniātakiti ikinika ! ikama kākiti, iuaritika itxïkitakaākana atāo inakari kamakani ininiuana. Kitxakapirïka Moisesi, Teoso sākire sāpiretakani apaka sāpiretari ikara. <sup>22</sup> Teoso txïkitakari kākiti atāo inakari kamakani ininiuana, Xesosi Kristo sākire auikasaakina. Itxïkitakari Xoteo, Xoteo minakanuia pakini atāo inakari kamakani ininiuana,

Xesosi sãkire auikasaakina. Xoteo minakatiua Teosomoni, Xoteotxikana itxaua. <sup>23</sup> Kotxi ikinimane kamari maerekati, ininiã !aposota aãpokini Teoso iotximere-moni. <sup>24</sup> Maerekati kamakaniua ate, iuaritika Teoso sikari ikinipoko erekari maxikatiïka atemoni, ininiã Teoso kamaerekataua ate, kotxi Kristo Xesosi iïkitxirauata ate ïkapani ipïkasaaki. Ininiã Teoso !imisiritaikaua amaerekani xika. <sup>25</sup> Teoso sikari Xesosi ipinini kãkiti ïkapani. Xesosi ipïkasaaki, Teoso makatxakari maerekati akamakiti. ! Imisiritaikaua ate, kotxi aãuikari Xesosi ipinini ïkitxitari Teoso, maerekati akamakiti. Teoso sikari Xesosi ipinini ate ïkapani. Ikara oerekaua atão inakaranoka ikamini. Mitxipitipanika Teoso !imisiritana kãkiti imaerekanina xika. Iãtapari iketo manapi apokini, kotxi iamoniãkari kãkiti. <sup>26</sup> Teoso sikari Xesosi, ininiã ipïpe kãkiti ïkapani, ininiã uatxa Teoso misiritari kãkiti maerekati ikamini xika, ininiã aimarotari Teoso atão inakaranoka kamakari itxaua iua, kotxi !auiritari maerekati kamakari inapakakini. Erekari Teoso, ininiã iua posotari ikamaerekatiniri kãkiti Xesosi sãkire auïãkani.

<sup>27</sup> Ininiã !apakata aãuikiniua, kotxi !auari aparïka akamaerekatakiri, ininiã !apakata aãuikiniua Teoso paniãtakiti iõkatsopatakori akamakasaaki. Teosora kamaerekataua, Xesosi sãkire aãuikasaaki. <sup>28</sup> Teoso paniãtakiti iõkatsopatakori kamakari atxiïti ! ikamaerekataãka, kotxi !auikari Xesosi sãkire. Xesosi sãkire auikakarinoa ikamaerekataãka. <sup>29</sup> Atauako Teoso Xoteo Teosonenanini itxataua? Konapitini. Xoteo minakaniua Teosonekanera apaka itxaua Teoso. <sup>30</sup> Teoso ätinoka aua. Iua kamaerekatana Xoteo, Xesosi sãkire auïãkani. Iua kamaerekatana Xoteo minakaniua apaka, Xesosi sãkire auikasaakina. <sup>31</sup> Ikara atoko ininiã, atxiïti kãkiti txari: “Teoso kamaerekataua ate, kotxi aãuikari Xesosi sãkire, ininiã Teoso paniãtakiti iõkatsopatakori !itxaika. Ininiã !akamaikari,” itxa kãkiti sãkire atxiïti.

Konapitini. Xesosi sãkire aãuikasaaki, anirekari iteene akaminiri Teoso sãkire paniãtakiti iõkatsopatakori.

## 4

### *Atão Inakari Kamakari Apraão*

<sup>1</sup> Maxinikari Apraão aïri kitxakapirĩkari. Natokopa itxa iua imarotakiti, Teoso kamaerekatiniri kãkiti? <sup>2</sup> Apraão kamakiti erekari kamaerekataãkamariko iua, ininiã iua iuikamauako. Txamari iua iuikiniua ! auari Teoso apisatoõ. <sup>3</sup> Teoso sãkire iõkatsopatakori txari:

Apraão auikari Teoso sãkire, ininiãkara Teoso txĩkitakari iua atão inakari kamakari ininiua.

<sup>4</sup> Parĩkauatakari ipatrãote sikari iparĩka ïki iuamoni. Maxikatĩka !iikitxitari iua. Isikari, kotxi iparĩkauata.

<sup>5</sup> Kãkiti auikiniãri Teoso kamaerekatiniri maerekati kamakari, iua kãkiti !iuikari iuaka parĩka. Imarotari iparĩka !ikamaerekatari iua. Teoso txĩkitakari ikara atoko inakari kãkiti atão inakari kamakari ininiua, kotxi iua auikari Teoso sãkire. <sup>6</sup> Kitxakapirĩka Tavii txari ikara atoko.

Iua sãpiretari kãkiti Teoso sikakiti erekari apakapakani. Teoso txĩkitakari iua atão inakari kamakari ininiua. Na iparĩkani txĩkitakari iua atão inakari kamakari ininiua.

<sup>7</sup> Tavii txari:

Teoso makatxakasaakiri kãkiti maerekani, !atamataikari maerekati ikamakiti. Teoso takari ikinipoko erekari kãkiti ikara atoko inakarimoni.

<sup>8</sup> Teoso !iaõtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirĩka.

<sup>9</sup> Atxiiti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtxikare auaitotakiti ïkapaninanini?” Konapitini. Ia erekari Teoso sikakiti Teoso takaõtxikare mauaitotakini ïkapani apaka. Nisãpiretapekai ia Teoso sãkire iõkatsopatakori:

Apraão auikari Teoso sãkire, ininiākara Teoso txīkitakari iua atão inakari kamakari ininiua, itxa Teoso sãkire iōkatsopatakori. <sup>10</sup> Kirisaakipa Teoso txīkitakari Apraão atão inakari kamakari ininiua? Atauako Teoso takaōtxikare Apraão iŋtoã auakasaakiikani? Konapitini. Takaōtxikari Apraão iŋtoã takiko apisapanikara, itxīkitakari Apraão atão inakari kamakari ininiua. <sup>11</sup> Merepanika Teoso txīkitakari Apraão atão inakari kamakari ininiua, eerekaikara itakari itakaōtxikare iŋtoã. Ikara Teoso takaōtxikare oerekari, mitxipeka Teoso txīkitakari Apraão atão inakari kamakari ininiua, kotxi iua auikari Teoso sãkire. Apraão auikari Teoso sãkire, Teoso takaōtxikare iŋtoã auini apisapanika. Ininiã Apraão ikini Teoso sãkire auiaākani iri atoko itxaua. Atxiiti Teoso takaōtxikare iŋtoãna !auari. luaritika ninoa iri atoko itxaua Apraão. Teoso txīkitakari ikinimane iua sãkire auiaākani atão inakari kamakani ininiuana. <sup>12</sup> Apraão Teoso takaōtxikare auaiŋtotakini iri atoko itxaua, ninoa auikiniāri Apraão sãkire Apraão auikiniri atokotxikana, kotxi Teoso auikari Teoso sãkire Teoso takaōtxikare iŋtoã auini apisapanika.

<sup>13</sup> Teoso sikaenetari itixi Apraōmoni, imekaniriakori pakinimoni. Ikara atoko Teoso sãkire, kotxi Apraão auikari Teoso sãkire. Iua auikari Teoso sãkire, ininiã Teoso txīkitakari iua atão inakari kamakari ininiua. Apraão kamakiti erekari !itxīkitakari Teoso sikaenetiniri itixi Apraōmoni. <sup>14</sup> Kākiti erekari kamakari Teoso sãkire mauiaākati !apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auiaākanimoninani. <sup>15</sup> Teoso paniātakiti iōkatsopatakori makamakati misiritaākako. Teoso paniātakiti iōkatsopatakori mauakaniã, maerekati !auari. Txamari auapitika Teoso paniātakiti iōkatsopatakori.

<sup>16</sup> Ininiã kākiti auikasaakiri Xesosi sãkire, apaka-

pari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitimoni. Ininiã ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniãtakiti iõkatsopatakori auakini apakapari. Xoteo minakaniua Teoso sãkire Apraão auikini atoko inakani apaka apakapari. Ate amakinika iri atoko itxaua Apraão. <sup>17</sup> Teoso sãkire iõkatsopatakori txari:

Teoso txari Apraão: “Nota txīkitakaiko pite itori āti uāka iri pininiua.”

Ininiã Teosomoni iua aīri atoko itxaua, kotxi Apraão auikari Teoso sãkire. Teoso txīkitakana ipīkani iuaīkana auāki inini. Iua kamari mitxi mauakati auini.

<sup>18</sup> Apraão kiomãtxipeka inakasaaki, kona keeneri. Iuaritika auikari Teoso sãkire. Iãtapari Teoso sikaenetakiti apokini. Ininiã apanakini āti uāka iri atoko itxapekaua Teoso sãkire iaōka. Teoso sãkire iõkatsopatakori txari:

Papika mekaniriakori kaiãopokopaniriko.

<sup>19</sup> Apraão seī anokanani inakasaaki, imarotari iito ipinanapanoka inini. Imarotari Sara !oposotaikari keene onini. Iuaritika iteene auikari Teoso sãkire. <sup>20</sup> ! Iotoka auikiniri Teoso sakiniri isikaenetakiti iuamoni. Iua auikari Teoso sãkire itaparaxinireritika. “Teoso posotari ikinipoko ikamini,” itxa. <sup>21</sup> Iua iteene imarotari Teoso posotiniri isikiniri isikaenetakiti. <sup>22</sup> Apraão auikari Teoso sãkire, ininiãkara Teoso txīkitakari iua atão inakari kamakari ininiua. <sup>23</sup> Na Apraãonanini Teoso txīkitaka atão inakari kamakari ininiua. <sup>24</sup> Iua txīkitakaua ate apaka atão inakari kamakani aniniua, aãuikiniãri Teoso sãkire. Aãuīte Xesosi ipīkasaaki, Teoso õkitikari iua iuaīkana auini ĩkapani. <sup>25</sup> Teoso sikari Xesosi kākitimoni ipinini ĩkapani maerekati akamakiti xika. Teoso õkitikari iua iuaīkana auāki inini ĩkapani, ate ikamaerekatini ĩkapani.

## 5

*Teoso !Omanataikaua Ate*

<sup>1</sup> Ininiã Teoso kamaerekataua, kotxi aãuikari isãkire, ininiãkara aãuïte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. <sup>2</sup> Aãuikasaakiri Xesosi sãkire, iusaaki aimarotari ikinipoko erekari Teoso sikakiti atemoni ikiniõtika. Iteene apoxokoniuaata, kotxi aiãtapari Teoso aaõkitini, iua iotximere aãtamadini ïkapani. <sup>3</sup> Apanakini misiritakasaakiua, apoxokoniuaata apaka, kotxi Teoso oerekaua amïteenekiniri amisiritiko. <sup>4</sup> Amisiritiko amïteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. <sup>5</sup> Erekari apokini aiãtapiniã, aãpakapapitkariko erekari, kotxi aãkixinireë aimarotari Teoso iteene tiritiniua. Erekari Matamatakoti Teoso sikakiti atemoni, oerekaua Teoso tiraõki aãkixinireë.

<sup>6</sup> Erekari akamini amaposotakanisaaki, Teoso amanirekakanisaaki, Kristo ipina ate ïkapani. Iua ipina iketo õti manapi. <sup>7</sup> Atxiïti kãkiti ipina atão inakari kamakari ïkapani iua mapinakani ïkapani? Atxiïti ! ipina iua ïkapani. Atxiïti kãkiti ipina ãti erekari kamakari ïkapani, iua mapinakani ïkapani? Atxiïti ipina iua ïkapani. <sup>8</sup> Teoso oerekaua ate, iua iteene tiritiniua ate, kotxi Kristo ipina ate ïkapani maerekati akamapanika anakasaaki.

<sup>9</sup> Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminaua, kotxi Teoso ! omanataikaua. !imisiritaikaua. <sup>10</sup> Ate Teoso omanatakani anakasaakiua, Teoso ãkiri ipina ate ïkapani. Ininiã Teoso mokaiakari !atxaikaua. Iua apakapaua. Iua apakapaua, ininiã amaerekani imaktxaka, ininiã aãuapininiika, kotxi iua õkitikaua auapininiika anini ïkapani Teosokata, kotxi Kristo auini auapika. <sup>11</sup> Teoso kamari ikara ate ïkapani. Apikomoni iua kaminapanikauako ate, kotxi iua

kamapoxokonitaua, kotxi aãũite Xesosi Kristo mikanapiriãua ate Teosomoni.

*Adão, Kristo Pakini*

<sup>12</sup> Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati.

<sup>13</sup> Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoã maerekati ikamakitina xika, kotxi iuasaaki !isãpiretapanikari ipaniãtakiti. <sup>14</sup> Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakori !apokapanika, iuaritika ikinimane ipina. Atxiãti kãkiti !ikamari maerekati Adão maerekani atoko, kotxi iua !ikamari Teoso paniãtakiti, iuaritika ikinimane ipina.

Kiki Adão inakori axinikasaaki, aimarotari iua Xesosi atoko ininiua.

<sup>15</sup> Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipĩkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina !kapani. Teoso siãkiti !iki !auari. !Erekari Adão sikakiti. Peerekari Xesosi Kristo siãkiti. <sup>16</sup> Kiki ãtika Adão inakori kamari maerekati. ãtinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iuasaaki imakatzakari ninoã maerekani. <sup>17</sup> Kiki ãtika, Adão inakori maerekani xika, Teoso txikitakari ikinimane ipinini. !Erekari iua kiki kamakiti. ãti kiki, Xesosi Kristo inakori kamakiti peerekari. Iua txikitakari kãkiti ãkixinire katapara inini maerekati imakamakani !kapani. Kãkiti ikara atoko inakari Teoso sikari ikinipoko erekari. Itori isika. Itxiãkitakari iua atão inakari kamakari ininiua. Ia ipariãka !iki !auari.



<sup>18</sup> Adão kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatina kākiti ninoa ātipirika auini ĩkapani. Iuasaaki atāonoka ikamakiti. <sup>19</sup> Kiki ātika Adão inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso sākire iaōka, ininiā itxīkitakari kākiti itomaneri atāo inakari kamakani ininiuana.

<sup>20</sup> Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiāāpota, iuaritika erekari Teoso sikakiti kākitimoni apiata. <sup>21</sup> Maerekanitxi txīkitakari kākiti ipinini. Erekari Teoso sikakiti kākitimoni txīkitakari kākiti auini ātipirika imaxipokakani tīkane, kotxi aāuīte Xesosi Kristo txīkitakari kākiti atāo inakari kamakari ininiua. Ininiākara kākiti auapininiika, kotxi Xesosi Kristo kamaerekatana.

## 6

### *!Anirekaikari Maerekati Akamini*

<sup>1</sup> Ininiā erekari atxiīti apikomoni maerekati akamini, ikinipoko erekari Teoso sikakiti apiata auini ĩkapani? <sup>2</sup> Konapitini. Teoso makatxakapekari amaerekani, kotxi iuasaaki !anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. <sup>3</sup> Apatxisatiko oerekari Kristo Xesosi nakitakori aniniua. Iuakata apinini atoko itxa apatxisatiko. Himarotapekari ikara. <sup>4</sup> Apatxisatiko oerekari Kristokata ikatakoni atoko aniniua, ininiā !anirekari apikomoni maerekati akamini. Kristo iri Teoso posotiire ōkitikari imi, iuaīkana auāki inini ĩkapani. Peerekari iposotiire.

Ininiã apatxisatiko oerekari Xesosi õkitikiko atokokana Teoso õkitikaua ate aãuini amaneri inini ìkapani.

<sup>5</sup> Aãuapika Kristokata, ininiã ãtika atoko atxaua iuakata aãuini, ininiã Kristo ipinini atokokana mitxi aãuini xipope. Kristo iuaïkana auini atokokana, aãuini amaneri. Peerekari, kotxi aãuapika Kristokata, ãtika atoko aniniua iuakata. <sup>6</sup> Mitxi anireëkiti xipope, kotxi Kristo makatxakari amaerekani aamina ìpiriãmitakari nopini ipïkasaaki ate ìkapani. Ininiã mitxi anireëkiti posotiire !auaika. Ixipokaãkapeka, kotxi mitxi anireëkiti maerekatinoka. Ininiã maerekanitxi nitiriakori atoko !atxaikaua. Aimarotari ikara. <sup>7</sup> Maerekanitxi na paniãtaikari kãkiti ipïkari.

<sup>8</sup> Kristokata ipïkani atoko aniniã, aimarotari iuakata aãuini apaka. <sup>9</sup> Ipïkasaaki õkitikaãka, ininiã !ipinaika. Aimarotari ikara. Ipïkitxi na kaposotiireikari iuaïkana Kristo ipinini ìkapani. <sup>10</sup> Iua ipina maerekanitxi posotiire ixipokini ìkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireëkitinoka ikamini ìkapani. <sup>11</sup> Iua atokotxikana anireëkiti maerekati xipope. Uatxa !anirekaikari maerekati akamini. Uatxa aãuapininiika Teosokata, iua nireëkitinoka akamini ìkapani, kotxi Kristo Xesosikata aãuapika.

<sup>12</sup> Ininiã na hãuiritapiri hiïto paniãtinii maerekati hïkamini. Na hïkamapiri maerekati hiïto nireëkiti. <sup>13</sup> Na hãuiritapiri hiïto kaminiri maerekati. Na hãuiritapiri hõki kaminiri maerekati. Na hãuiritapiri hinama kaminiri maerekati. Na hãuiritapiri hïuako kaminiri maerekati. Na hïkamapiri maerekati hiïto nireëkiti. Hïteka hïsikauako Teosomoni, kotxi mitxi ipïkani atoko hïtxaua, eereka Teoso txïkitakai auãki iuaïkana hinini, ininiã hïsikari hiïto ikinika Teosomoni. Atão inakaranoka hïkamako hõkiã, hinamaã, hïuakoã, imakinika hiïtoã. <sup>14</sup> Uatxa maerekanitxi apatrãote atoko !itxaikauako. Uatxa amisiritiko !

auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iuasaaki imakatzakari amisiritiko.

*Atão Inakari Nitiriakori*

<sup>15</sup> Ininiā atxiīti hītxano nota: “Maerekati makama, kotxi amisiritiko ! auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imakatzakari amisiritiko. Ininiā makamari maerekati,” atxa atxiīti. Konapitini. <sup>16</sup> Himarotari, hāuiritiniāri kākiti paniātinii iua nireēkiti hīkamini, ininiā iua hīpatrāote atoko itxaua. Iua nitiriakori atoko hītxaua, kotxi hīkamari iua paniātakiti. Maerekanitxi hīpatrāote ininiāua, hīkamari maerekati, ininiā hīpina. Ininiā kona hāua Teosokata ātipirika. Teoso hīpatrāote ininiāua, iua paniātakiti hīkama, ininiā atão inakarinoka hīkama. <sup>17</sup> Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hītxaua. Uatxa maerekanitxi nitiriakori ! hītxaikaua, kotxi iteene hīkīpitari hōerekiko. <sup>18</sup> Teoso makatzakapekai hīte, ininiā uatxa maerekanitxi nitiriakori ! hītxaikaua. Uatxa Teoso nitiriakori hītxaua, ininiā atão inakarinoka hīkama. <sup>19</sup> Ikara atoko nitxa sākireta hītemoni, kotxi himarotari nitiritxi, patrão pakini pirena. Himarotakiti poiāoka. Mitxi hāuiritari hīto kaminiri maerekati inireēkiti. Hāuiritari hīto apikomoni maerekati ikamaāpotini. Apiaāpota maerekati hīkamakiti. Iuasaaki hīto maerekanitxi nitiri atoko itxaua. Uatxa hīsikari hīto Teosomoni atão inakari nitiri ininiua ikapani, ininiā hīkamariko atão inakarinoka. Ininiā Teoso nakitiakorinoka hītxaua.

<sup>20</sup> Maerekanitxi nitiriakori hinakasaakiua, atão inakari nitiriakori na hītxaua, ininiā atão inakari na paniātai

hīte atāo inakarinoa hīkamini. <sup>21</sup> Īkiripa erekari hāpakapa, maerekati mitxi hīkamakasaaki? Kona kapakaparei. Uatxa hīpētāuata maerekati mitxi hīkamakiti xika. Maerekati kamiko xika kākiti ipina, ininiā kona aua Teosokata ātipirika. <sup>22</sup> Uatxa maerekanitxi na paniātaikai hīte. Uatxa Teoso nitiriakori hītxapekaua, ininiā hīkamari ikinipoko Teoso ĩkapani. Ininiā hāuapininiika hītxako Teosokata ātipirika. <sup>23</sup> Maerekanitxi kākiti patrāote atoko itxa. ĩkitxitari kākiti parīkatxi ĩki, txamari ipīkitxi itxaua parīkatxi ĩki. Teoso sikakiti atemoni ātiāo. !Aparīkauata Teoso sikakiti āāpakapini ĩkapani, iuaritika isikaua āūini ātipirika inini ĩkapani, kotxi āūiite Xesosi Kristo ipina ate ĩkapani.

## 7

### *Tanirauatakarō Atoko Atxa*

<sup>1</sup> Nitariakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. <sup>2</sup> Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. <sup>3</sup> Ōtaniri auapanika inakasaaki, ātikata oūiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

<sup>4</sup> Nitariakori, oa sito atokotxikana ate amakinika. Kristo ipina ate ĩkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitiakiti Kristo nakitiakori atxaua. Iua nakitiakori atxaua, ininiā erekari akama Teoso ĩkapani. <sup>5</sup> Mitxi anireēkiti maerekati paniātaua maerekati akamini. Aīto nirekari maerekatinoa ikamini, kotxi paniātakori iōkatsopatakori txari: “Kona

hīkamapiri maerekati.” Ininiã iusaaki apiata anirekari maerekati akamini, kotxi maerekatinoka kamakani atxaua. Ininiã apina, ininiã kona aãuapika Teosokata. <sup>6</sup> Mitxi paniãtakori iõkatsopatakori nirekari ipaniãtiniua. Uatxa paniãtakori iõkatsopatakori na paniãtaikaua. Ikara kitxakari. Uatxa amaneri, kotxi uatxa aparikauata Teoso ikapani. Erekar Matamatakoti oerekaua aparikauatini Teoso ikapani.

*Teoso Paniãtakiti Iõkatsopatakori*

<sup>7</sup> Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxiiti? Konapitini. Maerekati ! itxaua. Teoso paniãtakiti iõkatsopatakori mauakanimako, nota ! imarotamariko maerekati nikamini. Teoso paniãtakiti iõkatsopatakori txari:

Kona pinirekapiri ãti nakiti, ininiã ãti nakiti ninirekiniã, nimarotari nikaminiri maerekati. <sup>8</sup> Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari:

Kona pinirekapiri ãti nakiti.

Teoso paniãtakiti iõkatsopatakori mauakaniã, iusaaki maerekati ! auari. <sup>9</sup> Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika.

<sup>10</sup> Iusaakipeka nimarotari nãkixinire ipikari atoko inini. Teoso paniãtakiti iõkatsopatakori oerekari kãkiti erekari ikamini, iua auini ikapani. Txamari Teoso paniãtakiti iõkatsopatakori oerekano nota nipinini nimaerekani xika.

<sup>11</sup> Maerekati ninirekiti misirienetano. Imisirienetano, ininiã na nikamari Teoso paniãtakiti iõkatsopatakori

iaõka. Ininiã nikamari maerekati. Ininiã maerekati xika nipina.

<sup>12</sup> Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekarì. <sup>13</sup> Atxiiti erekari txikitakano nipinini? Konapitini. Maerekanitxi txikitakano nipinini. Maerekanitxi txikitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txikitakano nipinini. Ininiã aimarotari maerekanitxi kona xatiki apakata. Maerekatìnoka, kotxi maerekanitxi txikitakano nipinini. Teoso paniãtakiti iõkatsopatakori oerekaua ikara atoko inakari.

<sup>14</sup> Aimarotari Teoso paniãtakiti iõkatsopatakori iaxiti ìkari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ìkapani. <sup>15</sup> Na nimarotari nikamakiti, kotxi na nikamari notaka nireëkiti. Nikamari nimanirekakiniti, nomanatakiti. <sup>16</sup> Ininiã maerekati nimanirekakiniti nikamakasaaki, iusaaki nimarotari Teoso paniãtakiti iõkatsopatakori ereka inini. <sup>17</sup> Ininiã na notani kamari maerekati. Maerekati nãkixinireë auakarira txikitakari nikaminiri iua maerekati. <sup>18</sup> Nimarotari erekari ! auari nãkixinireë. Maerekatìnoka aua nãkixinireë, kotxi ninirekari erekari nikamini, txamari !niposotari. <sup>19</sup> Na nikamari erekari ninireëkiti. Nikamapikari maerekati nimanirekakiniti. <sup>20</sup> Ininiã nimanirekakiniti nikaminiã, kona notani kamari. Maerekati nãkixinireë auakarira txikitakano iua maerekati nikamini.

<sup>21</sup> Ininiã ia sãkiretxiti atão: Ninirekasaakiri erekari nikamini, maerekatìnoka niposota nikamini.

<sup>22</sup> Nãkixinireë iteene ninirekari Teoso paniãtakiti iõkatsopatakori iaõka nikamini. <sup>23</sup> Txamari aua ãti ninireëkiti niito ãki. Iua niito nireëkiti nirekari ixipokiniri nãkixinire nireëkiti. Iua niito nireëkiti xika nikamari maerekati nireëkitìnoka. !Niposotari erekari

nikamini. Kateia äki iaxirikakoni atoko nitxa. <sup>24</sup> !Erekanonota. Maerekati kamakarino nota. Kipa makatxakano, maerekati niïto nireëkiti nimakamakani ïkapani? Niïto txïkitakano nipinini. Kipa moianatano? <sup>25</sup> Aãuïte Xesosi Kristokara moianatano. Iuara makatxakano nimapinakani ïkapani. Peerekari Teoso, kotxi iua kamari ikara atoko nota ïkapani.

Ininiã uatxa ia atoko inakari nisãpiretai. Nãkixinireë ninirekari Teoso paniãtakiti iökatsopatakori nikamini. Txamari niïtoã maerekanitxi nireëkitinoka niposota nikamini.

## 8

### *Erekari Matamatakoti Txïkitakari Aãkixinire Auãki Inini*

<sup>1</sup> Ininiã uatxa Teoso !itxaikaua ate: “Maerekati hïkamakiti xika nimisiritaiko hïte,” !itxaikaua ate, kotxi Kristo Xesosi nakitiakori atxapekaua. !Akamaikari aïto nireëkiti. Erekari Matamatakoti sikaposotiiretaua iua nireëkiti akamini. <sup>2</sup> Erekari Matamatakoti nireëkiti akama, ininiã iua txïkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireëkiti nikamini, ininiã na nipina. <sup>3</sup> Aïto maerekani xika Teoso paniãtakiti iökatsopatakori !iposotari imakatxakiniri amaerekani, kotxi !aposotari akaminiri iua paniãtakiti. Iuaritika Teoso makatxakari amaerekani, kotxi iua iokanatarimi imi atemoni. Imi ïto ate ïto atoko, maerekati kamakari ïto atoko itxa. Teoso iokanatarimi atemoni ipinini ïkapani, amaerekani imakatxakini ïkapani. Ininiã ixipokari maerekati posotiire aïtoã auakari. <sup>4</sup> Teoso kamari ikara, ininiã Xesosi kamari ikinika Teoso paniãtakiti iökatsopatakori iaõka ate ïkapani, kotxi ipaniãtakiti atão inakarinoka. Ininiã !akamaikari maerekati aïto nireëkiti. Akamari Erekari Matamatakoti nireëkiti.

<sup>5</sup> Ītotxi nireēkiti kamakani xinikapikari iītona nireēkitinoka. Erekarī Matamatakoti nireēkiti kamakani xinikapikari Erekarī Matamatakoti nireēkitinoka. <sup>6</sup> Kākiti xinikiniāri iīto nireēkitinoka, ixinikakiti txīkitakari iua ipinini, ininiākara kona auapika Teosokata. Kākiti auiritiniāri Erekarī Matamatakoti txīkitakiniri ixinikiniri Erekarī Matamatakoti nireēkitinoka, iua auapininiika Teosokata. Erexaxinireri iua. <sup>7</sup> Kākiti xinikiniāri iīto nireēkitinoka, Teoso mokaiakariakori itxauana, kotxi ! inirekarina Teoso paniātakiti iaōka ikaminina. ! Iposotarina Teoso paniātakiti iaōka ikaminina. <sup>8</sup> Ītotxi nireēkitinoka kamakani ! iposotari ikamapoxokonitininirina Teoso.

<sup>9</sup> Hītepekana, Erekarī Matamatakoti hākixinire auiniā, hīkamari iua paniātakiti. ! Hīkamari maerekati hīto paniātakiti. Erekarī Matamatakoti kākiti ākixinireē mauakanisaaki, na Kristo nakitiakori ! itxauana, kotxi Erekarī Matamatakoti Kristo nakiti itxaua. <sup>10</sup> Hīto ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakarinoka ate ikapani. <sup>11</sup> Teoso ōkitikari Xesosi, iua ipīkasaaki. Erekarī Matamatakoti Teoso nakiti hākixinireē auiniā, Teoso Kristo ōkitikakari, txīkitakariko hīto ipinakari iuaīkana auāki inini, kotxi Erekarī Matamatakoti Teoso nakiti aua hākixinireē.

<sup>12</sup> Ininiā nitariakori, auapitika akamakiti tīkane Teoso ikapani. ! Auari akamakiti tīkane aīto nireēkiti akamini ikapani. <sup>13</sup> Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekarī Matamatakoti maerekati hīto kamakiti ixipokini, iusaaki hāuapika ātipirika Teosokata.

<sup>14</sup> Erekarī Matamatakoti nireēkiti kamakani, Teoso anaakori itxauana, kotxi Erekarī Matamatakoti Teoso nakiti. <sup>15</sup> Iua Erekarī Matamatakoti Teoso sikakiti hītemoni. ! Itxīkitakai nitiritxi kapīkareri hininiua. Itxīk-



itakai Teoso anaakori hininiua. Erekar Matamatakoti posotiireẽ aãkiritari aïri Teoso: “Papai, niri,” atxari. <sup>16</sup> Erekar Matamatakoti sãpiretaua aãkixinireẽ Teoso anaakori aniniua. <sup>17</sup> Teoso anaakori aniniãua, aãpakapariiko erekar Teoso nĩkatakiti ate ĩkapani. Kristo apakapari erekar Teoso nĩkatakiti iua ĩkapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auĩte inakasaakiua, ate apaka aua iuakata iuasaaki. Aãtamatar iua iotximere. Peerekari iuasaaki iuakata aãuini.

### *Aãpakapariiko Ikinipoko Erekar*

<sup>18</sup> Uai itixi aãuakasaaki, aãtatsiirauata. Eereka !axinikaikari mitxi aãtatsiirauatini, kotxi Teoso oerekauako ikinipoko erekar. Iuasaaki peerekari. <sup>19</sup> Ikinipoko Teoso kamakiti iãtapari ipoxokoniritika Teoso keto õti. Iuasaaki aimarotari Teoso anaakori. <sup>20</sup> Kotxi ikinipoko Teoso kamakiti misiritaãkapeka, ixipokaãpotini tĩkane. Ikinipoko Teoso kamakiti ixinireka !ixipokaãpota. Teoso txĩkitakari ikinipoko xipokaãpotini. Iuaritika aimarotari, ipĩkitxi xipokini õti apokapitikako. <sup>21</sup> Ikinika Teoso kamakiti iãtapari iua õti. Iuasaakiko itixi amaneri itxauako. !Ixipokaika. Iuasaaki ikinika amaneri. !Ixipokaika. Teoso anaakori misiritiko !auaika. Peerekari iuasaakiko.

<sup>22</sup> Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. <sup>23</sup> Na itixi Teoso kamakitinanini atatsiirauata. Aãkixinire apaka akiripireta, kotxi anirekar Teoso keto apokini. Iuasaaki iua apakapaua ate iua anaakori. Iuasaakiko aĩto amaneri isikaua. Iuasaakiko aĩto !kaxiporeikari. Merepanika Teoso sikakiti auapeka atemoni, kotxi iua sikapekar Erekar Matamatakoti atemoni. <sup>24</sup> Teoso makatxakapekar amaerekani, aãuikasaakiri

isākire. Ininiã aiãtapari apikomoni isikaenetakiti atemoni. !Aãtamapanikari isikaenetakiti, ininiã aiãtapanikari. Aãuikapitikari isikaenetakiti isikiniua, ininiã atão aãuikiniri. <sup>25</sup> Aiãtapari aãpakapakiti tĩkane. !Aãpakapapanikari, iuaritika aiãtapari apoxokoniritika, kotxi aimarotapitikari ikara apokini.

<sup>26</sup> Erekarı Matamatakoti moianataua, kotxi na kataparaxinireua. !Aimarotari aamanaãkiti tĩkane, Teoso amisãkiretakasaaki. Iuaritika, Erekarı Matamatakoti misãkiretari Teoso ate ĩkapani. Asãkireẽ !aposotari asãpiretiniri Teoso ikinika anireẽkiti, ininiã Erekarı Matamatakoti misãkiretari Teoso ate ĩkapani. Ipinimoni itxa isãpiretiniri Teoso. Kãkiti sãkireẽ !isãkirauata Teosokata. <sup>27</sup> Teoso imarotari kãkiti ãkixinire, ininiã iua imarotari Erekarı Matamatakoti xinikakiti, kotxi Erekarı Matamatakoti misãkiretari Teoso, Teoso nakitiakori ĩkapani. Erekarı Matamatakoti amanaãri Teoso, Teoso nireẽkiti ikaminana inakitiakori.

### *Teoso Iteene Tiretiniua*

<sup>28</sup> Aimarotari ikiniõtika erekarı ikaminaua ate, kotxi iua tirketani, iua mereẽkini atxaua ate. Iuaritika aãtatsiirauatini auapitika. Iuaritika iusaaki apaka erekarı ikaminaua. Iua mereẽua, kotxi inirekarı imereiniua. <sup>29</sup> Itixi kamiko apisapanika Teoso imarotapekua ate. Iua mereẽpekua ate, iua anaakori kaiãopokori aniniua ĩkapani. Imereẽpekua, imi Xesosi atoko aniniua ĩkapani. Ininiã Xesosi aĩtari apiari. <sup>30</sup> Teoso akiritana imereẽkini. Apaka ikamaerekatana iua mereẽkini. Apaka itanapoko erekarı isika ninoa ikamaerekatakinimoni.

<sup>31</sup> Teoso kamari ikinipoko ikara erekarı ate ĩkapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. <sup>32</sup> Teoso sikari ikinipoko atemoni. Imi apaka isika atemoni, kotxi ipina ate akinika ĩkapani. Isikari

## Homano 8:33      27      Homano 8:39

imi atemoni, ininiã aua atxiïti iua masikakiniti atemoni? !Auari. Ikinipoko erekari isikapitikaua atemoni. Ikarone !auari. <sup>33</sup> Aua atxiïti Teoso mereëkini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. <sup>34</sup> Aua atxiïti Teoso mereëkini misiritiko sãpiretakari? !Auari. Kotxi Kristora misãkiretari Teoso ate ïkapani, kotxi Teoso ikikomoni auakari itxaua. Iua ipina ate ïkapani, ininiã eereka Teoso òk-itikari iua, auapika inini ïkapani. Iuara misãkiretari Teoso ate ïkapani. <sup>35</sup> Ininiã kipa atxiïti iotokakatar Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkori auakasaaki, Kristo tiretapanikaua. Neenamtxi auakasaaki, Kristo tiretapanikaua. <sup>36</sup> Teoso sãkire iõkatsopatakori txari:

Pisãkire aãuikini xika, pamonõkoniri ikiniõtika. Aõkiko monõkoni auapika. Soti auïte apanakini okini atoko, apanakini nirekari okiniua ate, itxa Teoso sãkire iõkatsopatakori. <sup>37</sup> Maerekati ikara atoko aua, iuaritika iteene akãiata, kotxi atiretakiri sikataparataua. <sup>38</sup> Ia nimarota. Kristo tiretiniua iotokakakari !auari. Apïkasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. ïkorsaaki auakani, katana auakani apaka !iotokakari Kristo tiretiniua. !Auari posotiiiretxi, Kristo tiretiniua iotokakakari. <sup>39</sup> Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aãuïte

Kristo Xesosi oerekaua Teoso iteene tiritiniua.

## 9

*Teoso Mere*ēna Xoteoakori Inakitiakori Īkapani

<sup>1</sup> Atāo nisākire. Kristo nakiti nitxaua, ininiā na nisāpiretari misirieneretxi. Nākixinireē nimarotari nisākire atāo inini, kotxi Erekarī Matamatakoti oerekari nisākire atāo inini. <sup>2</sup> Ia nisākire atāo. Iteene nimatinaniuatapika. Nākixinireē maerekaxiniretinoka nitxa, ninirimane Kristo sākire mauikakani xika.

<sup>3</sup> Ninirekamari Teoso misiritinino nota, ninoa nitariakori imamisiritakani Īkapani. Ninirekamari Kristo manirekakanino nota, ninirimane Kristo nakitiakori ininiua Īkapani. Niposotiniāri ikara atoko nikamini, nikamari ninirimane Īkapani. Txamari ! niposotari.

<sup>4</sup> Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isāpiretana ninoa ikamaenetakiti ninoa Īkapani. Isikari ipaniātakiti iōkatsopatakori ninoamoni. Oerekana ninoa kiiniri atāo ikaminina, iuakata isākirauatakasaakina. Teoso sāpiretana ninoa ikamakiti tīkane ikinimane kākiti Īkapani. <sup>5</sup> Ninirimane apika atokiriakorini Apraōma, Isakima, Isaeoma pakini. Kristo uaimoni iponaniākasaaki, ninoa apiko mekaniri itxaua, iuaritika Teoso itxaua. Ikinimane auīte itxaua. “Peerekai,” matxari iua ātipirika. Ameē.

<sup>6</sup> Atxiīti Teoso kona kamari ikamaenetakiti Isaeo apika mekaniriakori Īkapani? Ikamapitikariko. Txamari kona ikinikani Isaeo apika mekaniriakori Teoso nakiti ! itxauana. <sup>7</sup> Kona ikinikani Apraō apika mekaniriakori atāo Teoso anaakori !itxauana, kotxi Teoso txari Apraō: Papika mekaniriakori atāo inakani Isaki mekaniriakori itxauana.

<sup>8</sup> Teoso sāpiretari Isaki auini, iua auini apisapanika. ! Isāpiretari āti Apraō ākiri Isimaeo inakori auini, iua

auini apisapanika. Isimaeo iponaniã, kotxi Apraão sirîka Isimaeo inorokata. Ininiã kâkiti Isimaeo atoko, Teoso anaakori !itxauana. Teoso sâpiretari Apraão iua keene inini, ininiã isikaenetakininoka atão Apraão apika mekaniriakori itxauana. <sup>9</sup>Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

<sup>10</sup> Apikomoni nisâpiretai. Hepeka anaakori iri âtika. Aâpika atokirini itxaua Isaki inakori. <sup>11-12</sup> Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sâpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereëri iua eereka iponaniãkari Xakoo inakori apiari inini îkapani, iua auini apisapanika. Ininiã na Xakoo kamakitini txîkitakari Teoso mereiniri iua. Teoso mereëri iua, kotxi inirekari ikara atoko inini. <sup>13</sup> Teoso sâkire iôkatsopatakori txari:

Xakoo nitireta. Isao nomanata.

<sup>14</sup> Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. Âtipirika Teoso kamari erekari. <sup>15</sup> Teoso txari Moisesi:

Ninirekiniãri âti niamonîkini, niamonîkari. Ninirekiniãri âti nimoianatini, nimoianatari.

<sup>16</sup> Ikara atoko ininiã, anireëkiti !itxîkitakari Teoso mereiniua. Akamakiti !itxîkitakari Teoso mereiniua. Imereëua, kotxi iamoniãkaua. <sup>17</sup> Teoso txari Paraoo isâkire iôkatsopatakoriã:

Nota txîkitakai auîtetxi pininiua, niposotiire noerekini îkapani, niuãka ikini itixiti auakani imarotini îkapani,

itxa Teoso sâkire iôkatsopatakori. <sup>18</sup> Ininiã Teoso nirekiniãri iamoniãkiniri âti, iua amoniãkari iua. Apaka

inirekiniāri, itxikitakari āti ākixinire kaikoxinire inini, Teoso nireēkiti imanirekakani tīkane.

*Teoso Omanākare, Iamonīkare Pakini*

<sup>19</sup> Atxiīti hīte txano nota: “Teoso ikara atoko ininiā, na ate xikani kaikoxinireua ate. !Aposotari akaminiri Teoso manirekakiniti,” atxiīti hītxano. <sup>20</sup> Txamari !apakata ia atoko hinini. Kiriparai hīte ikara atoko ina sākiretakani Teosomoni? Kākiti hītxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hīkamakirimoni. <sup>21</sup> Hīxinikari kiki tiitxi kamakari. Ikamari inireēkiti. Atxiīti āti porī katsariā, ikamari ipi kopiti. Atxiīti ianaka ikamari āti kopiti, peereri inini, kiiniri īkapani. Atxiīti ātipekana ikama patimari poiāo ereri, ikiniōtika iāriā iātiko īkapani.

<sup>22</sup> Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotinina īkapani imaerekanina xika. Iuasaaki oerekana iposotiire imarotininina īkapani. Teoso omanatana ninoa, iuaritika imīteenekana. Kona uatxa ixipokana ninoa. Txamari iketo manapi ixipokanako ninoa. Uatxa imīteenekapanikari ninoa maerekani. <sup>23</sup> Apaka ikamari apanakini iua amonīkakini. Uatxa imīteenekari iua omanatakini maerekani, kotxi inirekari iua amonīkakini imarotininiri iua ereka inini, kotxi peerekari iua. Iteene itiretari iamoniīkakini. Ikamana ninoa erekari isikakiti apakapinina īkapani. <sup>24</sup> Hīte, ate pakini, iua amonīkakini atxaua. Iua akiritakini atxaua. Na Xoteonanini akirita. Akiritana Xoteo minakaniua apaka. <sup>25</sup> Teoso sākire iōkatsopatakori, Oséia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hītxapekauako.” Ninoa mitxi nimatiretakinitimoni nitxako: “Uatxa nota tiretakini hītxapekauako,” nitxako.

<sup>26</sup> Mitxi Teoso txana ninoa: “Na nota nakitiakorini !hĩtx-  
 aua.” Ikara Teoso sãkiretiniãtaã, iuaãtaãtxikana:  
 “Teoso ätipirika auãki inakari anaakori hĩtxaua,”  
 inaãka ninoamoni,  
 itxa Teoso sãkire iökatsopatakori.

<sup>27</sup> Apaka Teoso sãkire iökatsopatakoriã, Isaía txari:  
 Isaeo apika mekaniriakori kaiãopokori, potxoari uniti  
 kipatxite atoko itxana, txamari poiãonoka  
 makatxakaãka imapinakani ïkapani.

<sup>28</sup> Patimari Teoso xipokiniri iparĩka imisiritiniri kãkiti  
 imaerekani xika,  
 itxa Isaía. <sup>29</sup> Mĩtxipeka Isaía txari:

Apiananiri kaposotiireri nĩkatari apanakini aãpika  
 mekaniriakori imapinakani ïkapani. Ininiã  
 atenape auapanika. Teoso manĩkatakanimauako,  
 axipokapiimako kãkiti Sotoma sitatxiti auakani  
 xipokini atoko, kãkiti Komoha sitatxiti auakani  
 xipokini atoko atxapiimako,  
 itxa Isaía sãkire.

### *Xoteo Mauikakaniri Teoso Sãkire*

<sup>30</sup> Ininiãkara aimarotari ia: Xoteo minakaniuma  
 manitakanisaakiri Teoso txĩkitakinina atão inakari  
 kamakani ininiuana, iusaaki Teoso txĩkitakana atão  
 inakari kamakani ininiuana, kotxi auikarina Teoso sãkire.

<sup>31</sup> Txamari Xoteoakori nitaãpotari paniãtakori ninoa atão  
 inakari kamakani txĩkitakakari, txamari ! apokarina.

<sup>32</sup> Kinirepa ! apokarina ikara? Kinirepa Teoso na  
 txĩkitakana ninoa atão inakari kamakani ininiuana? Kotxi  
 ! auikarina isãkire. Inirekarina iparĩkana txĩkitakinina  
 atão inakari kamakani ininiuana. !Inirekarina auikinirina  
 Xesosi sãkire. Ninoamoni Xesosi kai kimapori nopini  
 auakari atoko itxa, kotxi kai xika kãkiti mãkitita. <sup>33</sup> Teoso  
 sãkire iökatsopatakori kitxakapirĩkari sãpiretari ia kai  
 pirena. Itxari:

Pikenakotariko ia: Nota iokanatakiti kăkitimoni kai atoko itxa. Nitakari iua kai Siăo sitatxitiă Xoteoakori kimaporeë. Iua kai xika kăkiti măkitita. Iua kai xika kăkiti irika. Iuaritika iua săkire auiăkani ! ipêtauata nota apisatoõ.

## 10

<sup>1</sup> Nitariakori, năkixinireë iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimisăkiretari Teoso ninoa maerekani makatxakiko ĩkapani. <sup>2</sup> Nimarotari ninirimane iteene nirekiniri iparĩkauatini Teoso ĩkapani. Txamari ninoa kerokari, kotxi ! imarotarina atăo iparĩkauatini Teoso ĩkapani. <sup>3</sup> !Imarotarina Teoso txĩkitakiniri kăkiti atăo inakari ikamini. Ninoaka nirekamari atăo inakari ikaminina, Teoso apakapinina ĩkapani. Ininiă lauritarina Teoso txĩkitakinina ninoa atăo inakari ikaminina. <sup>4</sup> Kristo kamari ikinipoko Teoso paniătakiti iőkatsopatakori iaõka, ininiă iuanoka txĩkitakari ikinimane kăkiti iua săkire auiăkani atăo inakari ikaminina.

### *Apiananiri Akiritakani*

<sup>5</sup> Kitxakapirĩka Moisesi săpiretari atăo inakari akamini Teoso paniătakiti. Iuasaaki itxari: Ikinika Teoso paniătakiti iőkatsopatakori ikiniõtika pikaminiă, pauapininiika pitxako, itxa Moisesi săkire. <sup>6</sup> Txamari ! aposotari ikara atoko akamini. Aăuikasaakiri Xesosi săkire, iua txĩkitakaua atăo inakari akamini. Ininiăkara ! apakata păkixinireë pixinikiniri: “Kipa atxiĭti posotari iaxiti apiko nopinixitimoni isini, Kristo notamoni iminini ĩkapani?” <sup>7</sup> ! Apakata păkixinireë pixinikiniri: “Kipa atxiĭti posotari ipĩkani auiniătaă isini, Kristo notamoni iminini ĩkapani?” <sup>8</sup> Xesosi săkire auape hĭtemoni. Na hĭsa âtiătaă iua săkire himarotini ĩkapani. Hinamaăpekari. Hăkixinireëpekari. Xesosi săkire auikiko asăpiretapikari kăkiti. Ia atoko



asāpiretari kākiti: <sup>9</sup> Pinamaã, “Xesosi niauïte” pininiã, pākixinireë pauikiniãri Xesosi ipinini Teoso ôkitikiniri iua, iusaaki pimaerekani makatxakaãkako. <sup>10</sup> Kotxi aãkixinireë Xesosi sãkire aãuikiniã, ikamaerekataua. Anamaã “Maerekati kamakarino nota,” aniniã, iua makatxakari amaerekani. <sup>11</sup> Teoso sãkire iõkatsopatakori txari:

Iua sãkire auiãkari pëtauatini !uari.

<sup>12</sup> Iua Kristo sãkire auiãkari atxiïti Xoteo itxaua. Atxiïti Xoteo minakatiua itxaua. Xoteo auïte itxaua Kristo. Xoteo minakanuia auïte apaka itxaua. Ikinimane auïte itxaua Kristo Apiananiri. Isikari itanapoko erekari ikinimane iua akiritakanimoni. <sup>13</sup> Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imaktxakini ïkapani, iusaaki imaktxakaãkako imaerekanina.

<sup>14</sup> Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasãpiretakonisaakina?

<sup>15</sup> Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kākiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kākiti.

<sup>16</sup> Txamari na ikinimane kãkitini auikari Teoso iokanapirena erekari. Kotxi kitxakapirïka Isaía txari:

Apiananiri, asãpiretamari piokanapirena kãkitimoni, txamari !auikarina, itxa Isaía. <sup>17</sup> Kākiti kenakotakasaakiri Teoso iokanapirena, Teoso txïkitakari kākiti auikiniri isãkire. Kristo sãkire akenakotakasaaki, akenakotari Teoso iokanapirena.

<sup>18</sup> Txamari nota pimaãi: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari:

Iaxiti apiko nopinixiti auakari oerekari Teoso ikini itixiti auakani. Teoso sãkire atoko itxa iaxiti apiko nopinixiti auakari oerekakiti.

<sup>19</sup> Iuaĩkana nipimaãi: “Atauako Xoteo !imarotari Teoso iokanapirena?” Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã nitxĩkitakaiko hĩte hĩxikotinina ninoa mitxi nota nakitiakori minakaniua. Nitxĩkitakai hĩte homanãkarauatini, ninoa mitxi mimaroreni xika.

<sup>20</sup> Isafapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Ni-motika nota makiritakanimoni.”

<sup>21</sup> Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri ninoa kanapiriini no-tamoni, txamari !ikĩpitarina nisãkire. !Ikamarina nisãkire iaõka. Inireẽkitinoka ikamana.”

## 11

### *Xoteo, Teoso Sãkire Auiãkani*

<sup>1</sup> Ininiã nipimaãi: “Atauako Teoso !inirekaikari Xoteoakori?” Inirekapitikana. Nota apaka Xoteo nitxaua. Apraõ apika mekaniri nitxaua. Pẽxamiĩ apika mekaniri nitxaua. <sup>2</sup> Teoso !itakanapari Xoteoakori. Iua mereẽna ninoa itixi kamiko apisapanika. Himarotari Teoso sãkire iõkatsopatakori, Eríasi tsoatakasaaki Teosomoni Xoteo maerekani isãpiretakasaaki. <sup>3</sup> Iuasaaki Eríasi txari:

Apiananiri, ninoa okapekari kãkiti pisãkire sãpiretakani. Ikapirinikarina amesa pinakiti pitemoni sikakori

takikoãtaã. Notanoka pisãkire sãpiretakarino auapanika. Ninoa asikatikinitano nota okinino ïkapani,

itxa Eríasi. <sup>4</sup> Kanatokopa Teoso apakapapiretari Eríasi? Teoso txari:

Kona pitenanini auikari nisãkire. Nota ñikatari setxi mio kikiakori nota nakitiakori. Ninoa kona teosonetari kãkiti kamakiti Pao inakori. Kona ikapotentoreëkauana iua apisatoõ,

Teoso txari Eríasi. <sup>5</sup> Ikara atokotxikana uatxa. Aua apanakini kãkiti Teoso mereëkini. Imereëna ninoa, kotxi iua nirekari ikinipoko erekari ikaminina ninoa. <sup>6</sup> Maerekati kamakani kãkiti, iuaritika Teoso mereëua ate. Isikari ikinipoko erekari ate ïkapani maxikatíika. Aparíka !itxíkitakari iua sikiniri ikinipoko erekari atemoni. Aparíka txíkitakiniãri ikinipoko erekari isikiniua, ininiã kona maxikatíika isikarauata atemoni.

<sup>7</sup> Ininiã kanatokopa atxa asãkire apikomoni? Xoteoakori kona apakapari inireëkitina. Inirekarina Teoso apakapinina ninoa erekarini ininiuana. Teoso mereëkininoka apakapari ikara inakari. Apanakinipekana Teoso !aurita atão imarotinina. Mõsiãreni atoko itxana. <sup>8</sup> Teoso sãkire iõkatsopatakori txari:

Teoso txíkitakari ninoa ãkixinire imakakari atoko inini, iua sãkire imimarotakanina ïkapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !inirekarina Teoso sãkire ikípitinina. Uatxapiima ikara atoko itxapanika,

itxa Teoso sãkire iõkatsopatakori. <sup>9</sup> Kitxakapiríka Tavii txari Teosomoni:

Ninoa kiena kaiãopokori. Inipokotakasaakina, iuãkatarina pite apokaerekatina ninoa, kotxi kaiãopokori ikienana. Ikienana takapiri atoko itxa

imaïkinina ninoa. Itxïkitakana ikerokinina. Ikara xika ninirekari pimisiritinina.

<sup>10</sup> Ninirekari ninoa môsiãreni atoko ininiuana, ininiã na atão atamatarina pikimapore. Kãkiti tiitxi minari porikitakani atoko pitxïkitakanako ninoa ãtipirika, itxa Tavii sãkire.

*Xoteo Minakaniua Maerekani Makatxakiko*

<sup>11</sup> Iuaïkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiãkara Teoso sãpiretari Xoteo minakaniua imaerekanina imakatzakini, Xoteo xikotinina ïkapani, iuaïkana Teosomoni ikanapiriinina ïkapani. <sup>12</sup> Xoteoakori kamari maerekati, ininiãkara Teoso sikari erekari kiïkiri apanakini itixi auakanimoni. Xoteo mapakapakiniti Xoteo minakaniua apakapa erekari kiïkiri. Ininiã Xoteo kanapiriãkasaaki Teosomoni, iusaaki apiaerekata Teoso sikakiti kãkitimoni.

<sup>13</sup> Uatxa nota misãkiretai hïte Xoteo minakaniua, kotxi Teoso iokanatano nota hïtemoni isãkire nisãpiretini ïkapani. Niuikari hïtemoni niokanatiko. <sup>14</sup> Ikara atoko ininiã, atxiïti ninirimane Xoteo xikotai hïte, ininiã atxiïti apanakini ninoa kanapiriã Teosomoni, imaerekanina Teoso makatzakini ïkapani. <sup>15</sup> Teoso takanapakasaakiri Xoteo, iua apakapari Xoteo minakaniua, ininiã ninoa Xoteo minakaniua kanapiriã Teosomoni. Teoso iuaïkana apakapakasaakiri Xoteoakori, iusaakiko peerekari. Ipïkani iuaïkana auãki inini atoko itxako.

<sup>16</sup> Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. <sup>17</sup> Xoteoakori oriva mina takakori atoko itxa, takakori Teoso nakiti. ãtikaka ipori kapatakaãka. Oriva ïtopakiri

pori apaãka. Iapitaka inaãka ikapatakikoõtaã. Aneẽ takari katiã. Takari sikakienatari ïtopakiri pori. Hïte Xoteo minakaniua iua oriva ïtopakiri pori atoko hïtxaua. Hãpaka-pari Teoso sikakiti, kotxi hïte apotiitaua Xoteoakorikata, Teoso nakitiakorikata. <sup>18</sup> Hïte Xoteo minakaniua, kona hïuikapeua Teoso apakapinii hïte. “Iua aãpori kapatakiko atoko, Teoso takanapana Xoteoakori, ate apakapini ïkapani,” kona hïtxape, kotxi aãpori atoko hïtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hïte apakapari Teoso sikakiti, kotxi hãpotiitaua Xoteokata.

<sup>19</sup> Atxiïti hïte Xoteo minakaniua txano nota: “Iua aãpori kapatakaãkori atoko Teoso takanapari Xoteoakori. Æti aãpori iapitakiko atoko, Teoso apakapaua ate,” hïtxano atxiïti. <sup>20</sup> Atãopitikara. Teoso takanapari Xoteoakori, kotxi ninoa !auikari isãkire. Iua apakapai hïte, kotxi hïte auikari iua sãkire. Iuaritika !hïuikapeua ikara atoko hinakasaaki. Erepaniko. <sup>21</sup> Teoso takanapari Xoteoakori, takari pori sauakakori atoko. Ininiã erepaniko, kotxi ïtopakiri aãpori atoko hïtxaua. Atxiïti ãti õti okanapai hïte apaka.

<sup>22</sup> Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki. Itiraõki himanirekakaniã, hïte apaka mapara hõkaãka, iua aãpori sauakakori atokokana. <sup>23</sup> Xoteo takanapiniãri imauikakaniri Xesosi sãkire, auikiniãri iuaïkana isãkire, Teoso iuaïkana mikanapiriãna, kotxi Teoso kaposotiireri ikara atoko ikamini. <sup>24</sup> Hïte ïtopakiri pori sauakakori takarimoni iapitaãkori atoko hïtxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaïkana Teoso takinina ninoa, iuaïkana imikanapiriinina ninoa iuamoni.

*Xoteo Maerekani Makatxakaãkapanikako*

<sup>25</sup> Nitariakori ninirekari himarotiniri apanakini mi-marotakiniti, ininiã na hñuikaua. Xoteo ! inirekari auikiniri Teoso sãkire uatxa, iuaritika na ikara atoko litxapani ãtipirika. Ikini itixiti auakani Teoso nireẽkini Xoteo minakanuia kanapiriãkasaaki Teosomoni, iusaakiko Xoteo kanapiriãko Teosomoni. <sup>26</sup> Ininiã iusaaki ikinimane Xoteo kanapiriãko Teosomoni. Iusaaki Teoso makatxakari ninoa maerekani. Teoso sãkire iõkatsopatakori kitxakapirika auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireẽkitinoka inirekanako.

<sup>27</sup> Nimakatxakariko maerekati ninoa kamakiti, kotxi kitxakapirika nikamaenetari ikara atoko inakari, itxa Teoso sãkire iõkatsopatakori.

<sup>28</sup> Xoteoakori ! inirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hñte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereẽna ninoa. Apraão, Isaki, Xakoo pakini apika mekaniriakori itxauana, ininiãkara Teoso tiretapanikana ninoa. <sup>29</sup> Teoso kona mamakari isãkire. Kãkiti iua mereẽkini ãtipirika iua mereẽkini itxauana. Isiãkiti erekari kãkitimoni ! imakatxaka iuaikana. <sup>30</sup> Hñte Xoteo minakanuia kitxakapirika ! hñkñpitari Teoso sãkire, iuaritika uatxa Teoso amonikai hñte, kotxi Xoteo kona kñpitari Teoso sãkire uatxa. <sup>31</sup> Uatxa Xoteoakori kona kñpitari Teoso sãkire. Teoso amonikapekai hñte Xoteo minakanuia, ininiã Teoso iuaikana amonikanako Xoteoakori apaka. <sup>32</sup> Ikinimane kãkiti na kñpitari Teoso sãkire. Kona aposotari akñpitiniri Teoso sãkire. Teoso txikitakaua ikara atoko anini, kotxi inirekari aimarotiniri maerekati kamakani aniniua, iuaritika ! imisiritaua. Iamonikaua.

*Peerekari Teoso*

<sup>33</sup> Peerekari Teoso. Atāonoka ikama. Paimatireri iua. Kākiti !imarotari ikamakiti tīkane. Kākiti !imarotari inireēkiti tīkane. <sup>34</sup> !Kimarotikori Teoso xinikakiti. !Kōtākikikori Teoso. <sup>35</sup> Teosomoni ikinipoko aua, ininiā kipa asika atxiīti iuamoni? Asikiniri !auari. Ininiā !auari ate nakiti, iuaīkana Teoso sikiniua īkapani. <sup>36</sup> Kotxi Teosokara kamari ikinipoko. Ikinipoko aua Teoso posoti-ireē. Ikamari ikinipoko iua īkapani. Ātipirika matxariko Teoso: “Peerekai pite.” Ameē.

**12***Teosomoni Sikakori Auākiri*

<sup>1</sup> Ininiā nitariakori Teoso amonīkapitikaua. Ininiā nota iteene ōtākikai hīte. Hīteka hīsikaua Teosomoni. Teosomoni sikakori auākiri atoko hītxauako. Ininiā iua nakitinoka hītxaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atāo. <sup>2</sup> !Hīkamapinikariko Teoso sākire mauīākani kamakiti atoko. Hāuiritariko Teoso txīkitakiniri hīxiniāk-iti ereka inini, ininiākara ipinipo hītxako. Iuasaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atāo hīkamini.

<sup>3</sup> Teoso sikari ikinipoko erekari notamoni, ininiā nisāpiretari iua sākire hītemoni. Ininiā nota ōtākikai hīte hīkinika. Na hīuikapeua. Hīteka atāo himarotauako. Hīteka hātamakauako. Teoso txīkitakai hāuikiniri isākire. Iteene hāuikiniāri iua sākire, iteene hīteka himarotaua. <sup>4</sup> Kākiti īto ātika, iuaritika ītotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. <sup>5</sup> Iua atokokana atxa. Ītotxi ātika atoko atxa, iuaritika itoua ate. Kanoketxi, tapiketxi, okītxi,

kenakokitxi, itotxiã auakari atoko ate. Kristokata aãpoti-itaua. Anakititakakaua. <sup>6</sup> Nota parîka Teoso îkapani âtiã. Âti parîka Teoso îkapani âtiã. Âti parîka Teoso îkapani âtiã, itxaãpota. Teoso sikari erekari ikini-  
napemoni, ikara iparîka ikamini îkapani. Atxiïti Teoso sikaimaroretai iua sãkire apanakinimoni pisãpiretini îkapani, ininiãkara Teoso sãkire pauikini iaõka pisãpiretari Teoso sãkire kãkitimoni. <sup>7</sup> Teoso sikaimaroretiniã apanakini pimiparîkatini, ininiã pimiparîkatariko apanakini. Teoso sikaimaroretiniã isãkire poerekini, ininiã poerekarauatako. <sup>8</sup> Teoso sikaimaroretiniã âti pisikataparaxiniretini, ininiã pisikataparaxiniretariko âti. Teoso nirekiniãri pisikiniri apanakini amonitakiti ni-noamoni, ininiã ito pisikako pipoxokoniritika. Teoso sikaimaroretiniã auïtetxi pininiua, ininiã auïtetxi erekari pitxauako. Teoso nirekiniãri apanakini piamonîkini, ininiã pipoxokoniritika piamonîkanako.

### *Tiraõkitxi*

<sup>9</sup> Atão pitiretariko apanakini pãkixinireẽ. Pomanatariko maerekanitxi. Na piotokakapiri erekari pikamini. <sup>10</sup> Iteene hïtiretakakauako, kotxi Kristo txïkitakapekua aïtaritakakiniua. Piteka pipaxitiniua atokokana, apiata pipaxitariko âti. <sup>11</sup> Pitaparaxinireritika piparîkauatako. Na piarinouatape. Piparîkauatako Teoso îkapani pipoxokoniritika pãkixinireẽ. <sup>12</sup> Pipoxokoniuatako, kotxi pimarotari Teoso kaminiri ikamaenetakiti. Pimïteenekariko pimisiritiko. Âtipirika pimisãkiretariko Teoso. <sup>13</sup> Nipokori kaamatiniã pitariakorimoni, tiitxi kaamatiniã pitariakorimoni, auiniã pitemoni, pisikanako. Papakapanako pipoxokoniritika ikinimane Xesosi sãkire auïãkani paapoko apoãkani, âtiãtaã îkani.



<sup>14</sup> Pamanaãri Teoso erekari ikaminina pite misiritakani. Ari, pamanaãri Teoso erekari ikaminina nino. Na pamanaãpiri Teoso maerekati isikinina nino. <sup>15</sup> Pipoxokoniuatako poxokorinikata. Pitxiapata kamatinanirinikata. <sup>16</sup> Āti pitiretini atokotxikana, ikinimane pitiretako. Na piukapeua. Pisãkirauatako kãkiti matxineirotenikata, katxineiroteni pimisãkiretini atokotxikana. “Kimaroreno nota,” na pitxape.

<sup>17</sup> Kãkiti kaminiãri maerekati pitemoni, na pikamapiri maerekati iuamoni. Atãonoka pikama ikinimane ikapani. <sup>18</sup> Pinirekariko pauini kãkiti sauaki ereka inini, ininiã maxikatĩka kona pitxitapiri āti. <sup>19</sup> Nitiretakini, na hĩxikatxitapiri āti. Teosora xikatxitariko, kotxi Teoso sãkire iõkatsopatakori txari:

Nota parĩka āti nixikatxitini. Notara misiritari maerekati kamakari, itxa Apiananiri sãkire. <sup>20</sup> Ari, kona pixikatxitapiri āti. Pikamariko ātimoni ia Teoso sãkire iõkatsopatakori iaõka: Pomanatakiri natxitiniã, pisikakienatari iua. Iposonatinĩã, pisikari iãtini. Ikara atoko pikaminiã, ipẽtauata maerekati pitemoni ikamini, itxa Teoso sãkire iõkatsopatakori. <sup>21</sup> Na paunitapiri maerekati piauĩte atoko ininiuua. Erekari pikamakasaaki, maerekati iokanatapeẽkaika.

## 13

### *Aãũteakori Nirekakiti Akĩpitini*

<sup>1</sup> Akĩpitariko aãũteakori nirekakiti, kotxi Teosora auiritana nino auĩtetxiakori ininiuana. Teosora takari nino auĩtetxiakori aãũteakori ininiuana ikapani. <sup>2</sup> Aãũteakori nirekakiti amakamakaniã, Teoso nirekakiti apaka lakama, kotxi Teoso txĩkitakana nino aãũteakori ininiuana. Nino paniãtakiti amakamakaniã, amisiritaãkako. <sup>3</sup> Erekari

kamakani !ipikari iauitena. Maerekati kamakaninani pikana ninoa. Pinirekatari pimapikakaniri piauite? Ininiã erekari pikamako, ininiã iua txaiko: “Erekai pite.”  
<sup>4</sup> Teoso nitiri itxaua piauite, erekari pitemoni ikamini ikapani. Txamari maerekati pikaminiã, erepaniko. Pipikariko iua, kotxi iposotari imisiritinii. Iua Teoso nitiri itxaua kãkiti maerekati kamakani imisiritini ikapani. <sup>5</sup> Ininiãkara pikamariko piauiteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pãixiniree ikara atoko atão pikamini.

<sup>6</sup> Piauiteakori Teoso nitiriakori itxauana, ininiã erekari apaka pisikiniri txineiro ninoamoni iparikana ikaminina ikapani. <sup>7</sup> Ininiãkara piikitxitana ninoa amanaãkiti, sitatxi pauini ikapani, pitii papakapini ikapani. Pipaxitanako ninoa. Pikamariko ninoa nirekakiti.

### *Hĩtiretakiniua İkapani*

<sup>8</sup> Piikitxitariko ikinika piamotakiti. !Erekari pimaik-itxitakaniri ati. Atinoka tepito erekari. Ia tepito na txineironi. Ia tepito atiraoki. Ia atoko inakari tepito xipokini kona erekari. Atipirika hĩtiretakakauako. !Erekari pixipokiniri pitiretiniri ati. Ati tiretakari kĩpitapekari Teoso paniatakiti iokatsopatakori. <sup>9</sup> Teoso paniatakiti iokatsopatakori txari: “!Pisirikape pĩtanoro minakotokatika. Na pokaniuatape. Na piitiriuatape. Na pinirekapiri apanakini tii.” Akĩpitari ikara Teoso paniatakiti iokatsopatakori, apanakini ipaniatakiti apaka, ia Teoso paniatakiti atika akĩpitiniã. Ia Teoso paniatakiti paniataua: “Piteka pitiretiniua atokotxikana, pitiretariko ati.” <sup>10</sup> Pitiretiniãri ati, maerekati !pikaminiri iua. Ininiã ati pitiretiniã, pikamari Teoso paniatakiti iokatsopatakori ikinika.

<sup>11</sup> Matiretari āti, kotxi aimarotari kaiamapekari Kristo kanapiriini. Ininiā pimerekako. Kona pimakepeko. Piparīkauatako Teoso ikapani, kotxi itixine Xesosi anikiniua ōti apokaāpotanapanoka. Akokaxiti aāuikari Xesosi sākire. Uatxa paītiki ikanapiriā. <sup>12</sup> Īkanōkari xipokaāpotanapanoka. Pokamara apokaāpotanapanoka Kristo kanapiriākasaaki. Maerekati ipiākasaaki kamakori atoko itxa, ininiā maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiā maerekati !imaīkaua. Pokamarari atoko itxa erekari akamakiti. <sup>13</sup> Pokamara kākiti kamari atāo inakarinoka apanakini apisatoō. Makamari ikara atoko inakari ātipirika. !Erekari kiiniri maerekati akamini. !Erekari apoātini. !Erekari asirīkini sito aītanoro minakotokatika. !Erekari akaminiri maerekati aīto nireēkiti. !Erekari aneenamauatini. !Erekari axikotiniri āti. <sup>14</sup> Ikara atoko inakari akamini !erekari. Makamari ia atoko inakari: Maamanaāri Apiananiri Xesosi Kristo kapakiniua, sotato māka paikori sotato īto kapakini atoko. !Hīxinikapiri: “Kanatokopa nitxa nikaminiri niīto nireēkiti?” Kotxi maerekatinoka aīto nireēkiti.

## 14

### *Kona Hītaparakienatakapeua*

<sup>1</sup> Hāuiritariko Xesosi sākire poiāonoka auīākari hītekata apotiitiniua. Na hītxitapiri iua, ixinikakiti na hīte xinikakiti atoko iminakanisaaki. <sup>2</sup> Kākiti iteene auikiniāri Xesosi sākire, atxiīti inikari itanapoko nipokori. Āti kākiti poiāonoka auikiniāri Xesosi sākire, atxiīti inikari takarinoka. <sup>3</sup> !Erekari ikinipoko niākari sāpiretiniri takarinoka niākarimoni: “Pikerokari” ininiri. Apaka !erekari takarinoka niākari sāpiretiniri ikinipoko niākarimoni: “Pikerokari” ininiri, kotxi

Teoso apakapapekari iua. <sup>4</sup> Kinakariparai pite āti nitiri pinitakarii: “Pikerokari” ātimoni inakarii. Ikerokiniāri, iua patrāote pinitamariko. Maerekati ! ikama, kotxi Apiananiri moianatari iua.

<sup>5</sup> Atxiīti āti sākire: “Ia ōti erekari iteene axinikiniri Teoso.” Atxiīti ātipekana: “Ikiniōtika erekari iteene axinikiniri Teoso.” Hākixinireē hīxinikariko: “Natokopa itxa atāo nikamini?” ininiā eereka atāo hīkamini tīkane himarotape. <sup>6</sup> Hīte: “Ia ōti apiaerekata iteene axinikiniri Teoso,” hininiā, ininiā ikara atoko hīxinika Teoso hīpaxitini īkapani, ininiā erekapitikari. Ikinipoko niākari nikari ikinipoko, Teoso ipaxitini īkapani, kotxi apisapanika itxari Teoso: “Erekapitikai ia nipokori pisikinino niniāk-iti īkapani,” itxari. Ikinipoko maniākati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniākiti īkapani,” itxari. Ininiā iua apaka paxitari Apiananiri. <sup>7</sup> Kona ateka auītetaua. Kona aāua ateka īkapaninanini. Kona apina ateka īkapaninanini. <sup>8</sup> Auapanika anakasaaki, aparīkauata Apiananiri īkapani. Apīkasaaki, apina Apiananiri īkapani. Ininiā auapanika anakasaaki, apīkasaaki apaka, Apiananiri nakiti atxaua. <sup>9</sup> Kristo ipina, eereka ōkitikaua iuaīkana, auapanika inakani auīte ininiua īkapani, ipīkani auīte apaka ininiua īkapani. <sup>10</sup> Ininiā !apakata pitxitiniri pitari. “!Kīikitei,” kona pitxapiri, kotxi akinika aāpokako Teoso apisatoō. Iuasaaki iua sāpiretariko akamakiti, erekari inini atxiīti, maerekati inini atxiīti. <sup>11</sup> Teoso sākire iōkatsopatakori txari:

Nota Apiananiri, ātipirika auakari nitxaua. Ikinimane kākiti kapotoreēkauako nota apisatoō. Ikinimane txanoko nota Teoso nininiua.

<sup>12</sup> Ininiā iuasaakiikarako akinika asāpiretari Teoso ikinika akamakiti īkorapokoriti aāuakasaaki.

*Masikataparaxiniretakakaua*

<sup>13</sup> Ininiã h̄iotokakariko h̄itaparakienatakakiniua. H̄ãkixinireẽ h̄itxako: “!Nitx̄ikitakapaniri nitari kerokiniri ikamakiti. !Nitx̄ikitakapaniriko nitari kaminiri maerekati,” h̄itxako. <sup>14</sup> Xesosi Apiananiri nakiti nitxaua, ininiãkara nimarotari, apakatapitika Teoso s̄ãkire auiaãkari nikiniri ikinipoko nipokori, kotxi nipokori maerekati !auari. Iuaritika kãkiti auikiniãri iua nipokori maerekati inini, ! apakata inikiniri. <sup>15</sup> Hinikiniãri ikinipoko nipokori, atx̄iiti h̄itari ãkixinire maxirauata, ininiã na atão h̄itiretari iua. Kristo ipina iua h̄itari ãkapani, ininiã h̄itakanapariko iua nipokori hinikini, kotxi atx̄iiti iua !auikaikari Xesosi s̄ãkire, iua nipokori hinikini xika. <sup>16</sup> Erekaru auakasaaki, ! h̄ãuiritapiri ãti s̄ãpiretinii ikara erekari maerekati inini. <sup>17</sup> Teoso aãuĩte ininiãua, kona nipokorinanini, kona iãtakorinanini, axinika. Teoso aãuĩte ininiãua, axinikari Erekaru Matamatakoti sikakiti atemoni. Iua tx̄ikitakaua atãonoka akamini. Ikamaerekaxiniretaua. Isikapoxokonitaua. Teoso aãuĩte ininiãua, ikara atoko itxa aãuini. <sup>18</sup> Ikara atoko aparĩkauatiniã Kristo ãkapani, Teoso apokaerekataua. Kãkiti apaka apokaerekataua.

<sup>19</sup> Ininiãkara manirekari kãkiti auini ereka inini, neenamtxi mauakani ãkapani. Masikataparaxiniretakakaua. <sup>20</sup> Na himisiritapiri Teoso parĩka nipokori xika. Ikinipoko nipokori erekari hinikini, txamari h̄ite nikakiti tx̄ikitakiniãri ãti takanapiniri Kristo, h̄ikerokari. <sup>21</sup> H̄itari kerokiniãri ikamakiti h̄ite niãkiti xika, apiaerekata himanikakaniri iua nipokori. H̄itari kerokiniãri ikamakiti h̄ite iãtakiti xika, apiaerekata iua iãriã himiãtakani. Na xatiki h̄itx̄ikitakapiri h̄itari kaminiri maerekati. <sup>22</sup> H̄itemoni ikinipoko nipokori nikiko erekari, txamari na h̄isãpiretapiri apanakini. Erekaru Teosonoka imarotiniri. H̄ixinikasaakiri h̄ikamakiti atão inini, h̄ãkixinireẽ himarotakasaakiri h̄ikamakiti atão inini,

iusaaki hīpoxokoniuata. Ininiā kona hīteka apoītaua. <sup>23</sup> Hinikasaakiri nipokori, hākixinireē: “Erekari atxiīti ia nipokori ninikini?” hinakasaaki, iusaaki Teoso txai: “Maerekati pikama,” kotxi kona pauikari pikaminiri erekari. Himauikakaniāri hīkamakiti ereka inini, ininiā maerekati itxaua hīkamakiti.

## 15

*Āti Nireē*kiti Kamiko Pirena

<sup>1</sup> Atxiīti ikinipoko Teoso sākire aāuika, ininiā amoiatariko Teoso sākire poiāonoka auīākari, imaposotakiniti ikamini īkapani. ! Erekari ateka nireēkitinoka akamini. <sup>2</sup> Erekari akaminiri aītari nireēkiti, iua amoiatatini īkapani, Teoso sākire iteene auikini īkapani. <sup>3</sup> Kristo apaka ! ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri: Kākiti misākirepiretakasaakii pite, notara ninoa misākirepireta.

<sup>4</sup> Ikinika Teoso sākire iōkatsopatakori iōkatsopataāka ate oerekiko īkapani. Teoso sākire iōkatsopatakori aāuikasaaki, aiātapari apoxokoniritika erekari apokini. Aimarotari erekari apokapitikako. Teoso sākire iōkatsopatakori sikataparaxiniretaua.

<sup>5</sup> Teoso sikataparataua, ininiā apoxokoniritika aiātapari erekari apokini. Isikataparaxiniretaua. Ninirekari Teoso txīkitakiniri hīte nireēkiti ātinoka inini, Kristo Xesosi nireēkiti iaōka hīkamini. <sup>6</sup> Erekari hinireēkiti hākixinireē ātinoka inini. Erekari hīsākire ātinoka inini. Ikara atoko hininiā, hīkinika txari Teoso: “Peerekai pite,” kotxi iua aāuīte Xesosi Kristo iri itxaua.

*Xoteo Minakaniua Poxokoniuatini*

<sup>7</sup> Hāpakapariko āti, Kristo apakapinii atokokana, ininiā kākiti txari Teoso: “Peerekai pite,” txariko.

<sup>8</sup> Nisāpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraãomoni, Isakimoni, Xakoo pakinimoni, isikaenetakiti apokapeka Xesosi ïkorapokoriti apokasaaki.

<sup>9</sup> Kristo Xoteoakori nitiri atoko itxapekaua, ininiã Xoteo minakaniua txari: “Kaamonïkareri Teoso. Peerekari iua,” itxana. Teoso sãkire iökatsopatakori txari:

Xoteo minakaniua auiniãtaã nitxariko Teoso: “Peerekai pite.” Nixikarauata pite ïkapani, kotxi peerekai pite.

<sup>10</sup> Iuaïkana Teoso sãkire iökatsopatakori txari:

Hïte Xoteo minakaniua hïpoxokoniuatako Xoteoakorikata, Teoso nakitiakorikata.

<sup>11</sup> Iuaïkana Teoso sãkire iökatsopatakori txari:

Hïte hïkinika Xoteo minakaniua, “Peerekari Apiananiri” hïtxako. Hïkinika itixi auakanii hïxikarauatako Teoso ïkapani.

<sup>12</sup> Iuaïkana Teoso sãkire iökatsopatakoriã Isaía txari:

Auako Xesee apika mekaniri. Xoteo minakaniua auïte itxauako. Ninoa imarotariko isãkire iaõka ikamini, itxa Teoso sãkire iökatsopatakori.

<sup>13</sup> Teosora txïkitakai himarotiniri isãkire iaõka ikamini. Ninirekari iua iteene kamapoxokonitini hïte. Ninirekari ikamaerekaxiniretinii hïte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekari Matamatakoti posotiireẽ himarotari ikara.

*Paoro Teoso Iokanapirena Erekari Sãpiretakari Xoteo Minakonimoni*

<sup>14</sup> Nitariakori, nota imarotari ereka hinini. Nimarotari hïte iteene kimarore hinini hõerekakakiniua ïkapani. <sup>15</sup> Iuaritika ia niökatsopatakitiã nõtãkikapekai hïte nitaparaxinireritika. Himarotakiti, iuaïkana nisãpiretai, iuaïkana hïxinikiniri ïkapani. Teoso sikari erekari notamoni, ininiã ikara atoko niökatsopata hïtemoni. <sup>16</sup> Teoso

sikari erekari notamoni, kotxi itxĩkitakano Xesosi Kristo nitiri nininiua. Ipaniātano niparĩkauatini Xoteo minakanuia ĩkapani. Sasetotxi apakapari kākiti mĩkiti, ininiã sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua. Nisãpiretari Teoso iokanapirena erekari Xoteo minakonimoni, ininiã ninoaka sikaua Teosomoni inireėkiti ikaminina ĩkapani. Teoso apakapari ikara atoko inakari ninoaka iuamoni sikakaniua. Erekari Matamatakoti kamaerekatari kākiti Teoso apakapinina ĩkapani.

<sup>17</sup> Ininiã Teoso ĩkapani niparĩkauatakasaaki, niuikari Xesosi Kristo. <sup>18</sup> Nota kona iuikaua, kotxi Kristo posotiireė Xoteo minakanuia kamari Teoso nireėkiti. Kristo paniātano nota iua sãkire nisãpiretinina Xoteo minakanuia. Ipaniātano inireėkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireėkiti. <sup>19</sup> Erekari Matamatakoti posotiireė noerekari Teoso takaõtxikare ninoamoni. Noerekari posotiiretxi kākiti maposotakinini ninoamoni. Ininiãkara ninoa kamari Teoso sãkire iaõka. Kristo iokanapirena erekari ikinika nisãpiretapekari kākiti Xerosareė sitatxiti auakani. Eereka kākiti apikoxiti auakani nisãpireta. Eereka kākiti apikoxiti auakani nisãpireta. Nitxaãpota kākiti nisãpiretini. Imapotõkire Iriria tixinipeka napoka, Kristo iokanapirena erekari nisãpiretini ĩkapani. <sup>20</sup> Ātipirika ninirekari nisãpiretiniri Kristo iokanapirena erekari Kristo mimarotakoniãtaã. Ininiã kona niparĩkauata Teoso ĩkapani āti parĩkauatiniãtaã, kotxi āti sãpiretapekari Kristo iokanapirena kākiti iuaãtaã. <sup>21</sup> Kotxi Teoso sãkire iõkatsopatakori txari:

Mitxi iua masãpiretakoni imarotariko iua sãkire. Mitxi iua sãkire makenakotakani imarotariko iua sãkire, itxa Teoso sãkire iõkatsopatakori.

<sup>22</sup> Kaiãokataikani ninirekamari nisini hĩtemoni, txam-



ari kona apakata, kotxi iuasaaki nisãpiretari Kristo sãkire Kristo sãkire mimarotakanimoni.

*Paoro Seenetini Homamoni*

<sup>23</sup> Itokanani ninirekamari naõkitinii hĩte. Uatxaika apakata nisini hĩtemoni, kotxi nixipokapekari niparĩka ĩkorapokoriti. <sup>24</sup> Nirekari Espãnia tixinimoni nisini. Iuaã nisikasaaki, ninirekari naõkitinii hĩte. Ninirekari mapaõti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espãniamoni nisini ĩkapani, ininiã eereka Espãnia tixinimoni nisa. <sup>25</sup> Uatxa hĩtemoni nisini apisapanika, nisa Xerosareẽmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ĩkapani. <sup>26</sup> Kristo sãkire auiãkani, Xoteo minakanuia Masetõnia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxitiã. <sup>27</sup> Ninoa poxokoniuaata oa txineiro isikinina Xerosareẽ auakanimoni. Erekarĩ oa txineiro isikinina, kotxi Xoteoakori Kristo sãkire auiãkani sikari Teoso sikakiti Teoso iokanapirena erekarĩ Xoteo minakonimoni. Ininiã erekarĩ Xoteo minakanuia sikiñiri ipixini itxineirotena Teoso sikakito, Xoteoakorimoni. <sup>28</sup> Ininiã oa txineiro nanika Xerosareẽ auakanimoni. Ninoamoni txineiro nisika atoko, ininiã eereka nipotorika Espãniamoni nisini. Espãnia napokini apisapanika nisako hĩtemoni. <sup>29</sup> Ereẽ napokasaaki, nisãpiretai ikini sereti erekarĩ Kristo sikakiti hĩtemoni.

<sup>30</sup> Nitariakori nota amanaãĩ hĩte, himisãkiretiniri Teoso nota ĩkapani. Hĩkenakotatari namanaãkiti? Himisãkiretariko Teoso nota ĩkapani. Xesosi Kristo aãũite itxaua, ininiã namanaãĩ himisãkiretiniri Teoso nota ĩkapani. Erekarĩ Matamatakoti txĩkitakaua atiraõkiuatini, ininiã himisãkiretari Teoso nota ĩkapani. Ikara atoko hĩkaminiã, Teoso sikataparatanõ nimisiritiko auakasaaki.

<sup>31</sup> Kristo sãkire mauiãkani Xotẽia tõpa auakani nirekarĩ

imisiritinino nota. Himisãkiretari Teoso ninoa mamisir-itakanino ìkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakaniuua iokanatakito. <sup>32</sup> Ininiã Teoso nirekiniãri, napoka hĩtemoni nipoxokoniritika. Ininiã asikapoxokonitakakaua. <sup>33</sup> Teoso akamaerekaxiniretakiri aua hĩtekata. Ameẽ.

## 16

### *Paoro Akiriuãkaãpotana Ixinikakini*

<sup>1</sup> Niokanataro aĩtaro Pepi inakoro hĩtemoni. Peerekaro oa. Omoianatana Xesosi sãkire auiãkani Sẽkireia sitatxiti auakani. <sup>2</sup> Apiananiri nakito otxaua, ininiã hãpaka-paroko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

<sup>3</sup> Hĩsãpiretanako Pirisira, oĩtaniri Ákira pakini nixinikamanapitinina ninoa. Ninoa parĩkauatapeka Kristo Xesosi ìkapani notakata. <sup>4</sup> Okaãkanapanokana nota imoianatinina xika. Peerekana, kotxi erekari ikaminanona. Xoteo minakaniuua, ikini Teoso misãkiretikoãtaã apotiitaniuua apaka imarotari erekari Pirisira, Ákira pakini kamakiti nota ìkapani. <sup>5</sup> Xesosi sãkire auiãkani apotiitaua ninoa aapoko Teoso imisãkiretinina ìkapani, ininiã hĩsãpiretanako nixinikamanapitinina ninoa.

Hĩsãpiretariko nitiretakiti Epeneto inakori nixinikamanapitiniri iua. Ásia tixiniã iua merepitipanika aukari Kristo sãkire. <sup>6</sup> Hĩsãpiretaroko Maria nixinikamanapitiniro oa. Oa iteene parĩkauata ate ìkapani. <sup>7</sup> Hĩsãpiretanako ninirimane Ætoróniko, Xónia pakini nixinikamanapitinina ninoa. Mitxipe ninoa aua notakata kateia ãki. Teoso kãkitimoni iokanatakini iteene

imarotana Ātoróniko, Xónia pakini. Ninoa ipi auikari Kristo sãkire, iua sãkire nauikini apisapanika.

<sup>8</sup> Hīsãpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. <sup>9</sup> Hīsãpiretariko Opano nixinikamanapitiniri iua. Iua parĩkauata Kristo ĩkapani atekata. Hīsãpiretariko nitiretakiti Esitaki nixinikamanapitiniri iua. <sup>10</sup> Hīsãpiretariko Aperi nixinikamanapitiniri iua. Imisiritiko sauaki iua ! ikipatari Kristo sãkire auikini. Hīsãpiretanako Arisitóporo aapoko auakani nixinikamanapitinina ninoa. <sup>11</sup> Hīsãpiretariko ninirimane Erotxião nixinikamanapitiniri iua. Hīsãpiretanako Apiananiri nakitiakori Nasiso aapoko auakani nixinikamanapitinina ninoa.

<sup>12</sup> Hīsãpiretanako sitoakoro Tipena, Tiposa pakini nixinikamanapitinina ninoa. Ninoa parĩkauatapitipo Apiananiri ĩkapani. Hīsãpiretaroko nitiretakito Pesitxi nixinikamanapitiniro oa. Oa apaka parĩkauatapitipo Apiananiri ĩkapani. <sup>13</sup> Hīsãpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro taretano nota, ninoro taretinino atokotxikana. <sup>14</sup> Hīsãpiretanako Asĩkiriti, Pirekõtxi, Émisi, Pataropa, Émasi, ikinika aĩtariakori ninoakata apotiitakaniua pakini nixinikamanapitinina ninoa. <sup>15</sup> Hīsãpiretanako Piróroko, Xória, Nereo, Nereo itaro, Orĩpa, ikinika Teoso nakitiakori ninoakata apotiitakaniua pakini nixinikamanapitinina ninoa.

<sup>16</sup> Himaaratakakauako, kotxi aĩtaritakakaua. Kristo nakitiakori ikini Teoso misãkiretikoãtaã apotiitakaniua xinikamanapitai hĩte.

*Paoro Ôtãkikare Maopotõkire*

<sup>17</sup> Nitariakori iteene nõtãkikai hĩte. Erepaniko kãk-iti neenamati nirečkani. Ninoa nirekari Kristo sãkire

auiākani omanatinina apanakini Kristo sākire auiākani. Na atão ninoa oerekakiti sākiretxiti, ininiã atxiiti kākiti takanapari Kristo sākire auikini ninoa oerekakiti xika. Kristo sākire nota oerekakiti hītemoni atão. Ninoa oerekakiti koketakori sākiretxiti. Ninoa moianariakori kona hītxapeua. <sup>18</sup> Kākiti ikara atoko inakani kona parīkauata aāuīte Kristo īkapani. Ninoa parīkauata iītona nireēkiti īkapani. Imisirienetarina kākiti sākire auiākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. <sup>19</sup> Ikinika kākiti imarotari hīte kaminiri Kristo sākire iaōka, ininiã nota iteene poxokoniūata hīte ikara atoko hininiã. Ninirekari kiūkite hinini erekari hīkamini īkapani. Ninirekari himimarotakaniri maerekati hīkamini. <sup>20</sup> Teoso akamaerekaxiniretakiri, paītiki xipokariko Satañasi posotiire, ininiã hīposotari hīokanatiniri Satañasi isini.

Aāuīte Xesosi Kristo ātipirika sikari ikinipoko erekari hītemoni.

<sup>21</sup> Tximótxio, notakata parīkauatakari, xinikamanapitai hīte. Ninirimane Arósio, Xasão, Sosipato pakini xinikamanapitai hīte apaka.

<sup>22</sup> Nota Tésio inakori iōkatsopatari ia iōkatsopari Paoro īkapani. Nota apaka xinikamanapitai hīte, kotxi Api-ananiri nakiti nitxaua.

<sup>23</sup> Nota Paoro aua Kaio aapoko. Kristo sākire auiākani apotiitaua iua aapoko Teosokata isākirauatinina īkapani. Iua nirekari himarotiniiri iua xinikamanapitini hīte. Erásito inakori apaka xinikamanapitai. Txineiro nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

<sup>24</sup> Aāuīte Xesosi Kristo ātipirika sikari ikinipoko erekari hītemoni. Ameẽ.

<sup>25</sup> “Peerekari Teoso,” matxako. Iua posotari ikamat-aparaxiniretinii hīte, ininiã kona hītokakari hāuikiniri

Kristo sãkire. Teoso iokanapirena erekari nota sãpiretakiti, Xesosi Kristo sãkire pakini sãpiretari ikara atoko inakari. Ikara Teoso sãkire kitxakapirika !kimarotikori. Uatxa imarotapeẽkaika. <sup>26</sup> Ìkorasaaki asãpiretapekari ikara Teoso sãkire, Teoso sãkire sãpiretakani iõkat-sopatakiti kitxakapirika. Uatxa aimarotari ninoa sãpiretakiti. Teoso auapika inakari paniãtari isãkire sãpiretiko ikini itixiti auakanimoni. Ininiã apakata ikinimane auikiniri isãkire. Apakata ikinimane kaminiri inireẽkiti iaõka.

<sup>27</sup> Iuanani Teoso txaua. Iuanokara imarotari atão ikinipoko. Ætipirika matxariko iua: “Peerekai pite, kotxi peerekari Xesosi Kristo.” Ameẽ.

## **Teoso sãkire ameneri New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Apurinã

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

